

明朝典彙



			九	漢
		一	二	書
		〇	〇	門
		四	五	
六	一	〇	〇	
四	三	四	五	
冊	架	函	號	類

庫	文	閣	內	
元	九			漢
四	二			書
函	〇			
二	天			
三	〇			
四	五			
架	冊	號	類	

內閣文庫	
番號	漢 9205
冊數	64 (28)
函號	294 39

共

0 1 2 3 4 5 6 7 8 9 00

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM. Kodak



國朝典彙卷五十五

天齋

都察院右僉都御史臣徐學聚 編輯

南京兵部左侍郎臣謝啓光 訂正

吏部 二十一

總督巡撫

建文元年三月遣採訪使都御史暴昭侍郎夏原吉給事
中徐思勉等二十四人巡行天下問民疾苦與廉黜貪

得便宜行事

永樂五年五月巡視浙江右僉都御史李士吉還京上聖
孝瑞應頌 上曰爾以大臣出視民瘼既歸其民情如

如何年穀如何水患如何未聞有一語汲汲進諛詞都御史行事固如此乎命擲還之

十年十一月命右庶子楊榮經畧甘肅軍務甘肅守臣宋琥言老的罕叛數入赤斤蒙古衛為寇上以榮曉暢軍旅命至陝西會豐城侯彬議進兵方畧是冬榮還言出嘉谷關千里險阨乏水草餉道弗能通又沍寒士馬疲瘠不可輒用兵罷中國彼小醜當自來歸上從之未幾老的罕復降

十九年四月勅吏部尚書蹇義等二十六人巡行天下安撫軍民應天則蹇義四川則禮部尚書金純陝西則左

都御史劉觀河南則右都御史王彰湖廣則吏部侍郎師達畿甸則禮部侍郎郭墩福建則刑部侍郎楊勉江西則工部侍郎郭進山東則工部侍郎鄭剛浙江則副都御史虞謙廣西則通政叅議朱侃山西廣西則大理寺丞孫時郭瑄併給事中馬俊艾廣陶衍等十三人比還京蹇義言國家多事時盡法繩吏人將不勝斥太甚者數人衆皆服其得體

命右都御史王彰巡撫河南時有告周府將為不軌者上欲及其未發討之以問彰彰曰未有跡討之無名上曰非爾所知也兵貴神速彼出城則費力矣彰日以



臣之愚可不煩兵但得御史三四人隨臣以往足矣臣請任之然須奉勅以臣巡撫其地乃可於是彰奉勅往巡撫既至黎明直造王府王驚愕延彰別室問所以來者曰人告王謀叛故王驚跪彰曰朝廷已命丘太師將兵十萬將至矣臣以王事未有跡故來諭王王舉家環哭不已彰曰哭亦何益但速求所以釋上疑者王曰愚不知所出願公教我彰曰能以三護衛獻上則可無事王從其言彰乃馳驛以聞上喜彰出示護衛軍三日不徙者處斬不數日而軍散果不煩兵也

洪熙間嘗命廣西布政司周幹巡視直隸浙江宣德初幹還言有司多不得人土豪肆虐良民苦之乞命廷臣往來巡撫庶民安田里下吏部會戶部工部議遂命廣西按察使胡槩爲大理寺卿同四川叅政葉春巡撫直隸及浙江諸郡此巡撫之始

〔按〕巡撫之名實始於洪武辛未是年勅遣皇太子巡撫陝西也建文永樂巡行大臣竝以給事中佐之宣德五年九月陞吏部郎中趙新爲吏部兵部郎中趙倫爲戶部禮部員外吳政爲禮部御史于謙爲兵部刑部員外曹弘爲刑部越府長史周忱爲工部各右侍郎巡撫各省兩畿總督稅糧新江西倫浙江政湖廣謙河南

山西弘北直隸及山東忱南直隸
于謙巡撫二省遍歷梁晉問民疾苦百弊漸剔馬政河
防民租軍賦一經擘畫遂爲規式凡歷十八年每議事
入京不持一物兩京人皆尸祝之
周忱以長史廷薦巡撫旣而陞戶部尚書改工部尚書
仍巡撫江南二十二年江南之人愛戴如父母沒而尸
祝至今思周尚書也

時古水羅汝敬以工部侍郎兼修撰奉使交趾回道過吳
中適熊槩巡撫茲地盛作威福大家巨族少被誣者隨
至籍沒冤號之聲不可聞汝敬與槩有鄉里之好因以
陰隲之說諭之槩不省汝敬至京謁見陳奉使事畢遂
以槩事具奏 上覽之惻然卽日召槩回京而以周忱
代之自是東南之民得安

正統元年正月以僉都御史王翱鎮守江西翱以楊士奇
薦抵任植良善抑奸貪風裁凜然

三月命兵部左侍郎柴車叅贊陝西軍務先是虜酋朵兒
只伯擁衆入寇鎮番副總兵劉廣往援遇虜而退虜隨
逼涼州廣閉門不出虜大掠而去廣奏功徼賞車劾其
罔上不法請治之又劾奏寧夏守將失律詔各械繫至
京下獄朝廷以車公嚴執法可當師帥之任故有是命

十二月命兵部尚書王驥巡視陝西邊務從便宐行事先是鎮守平涼都御史羅亨信與都督趙安幸岷洮等衛兵巡邊遇虜安與都督蔣貴聽都指揮安敬議逗留不行亨信至其營責之貴等以芻糧不繼而解亨信劾貴敬等老師玩寇侵尅軍餉乞正罪以振軍法故有是命進贊理陝西軍務侍郎柴車祿從二品車盡心邊務每糾劾將佐欺玩章前後凡數十上或休以後患車曰吾敢愛身以誤國乎同事者多耽晏樂忽犬計車遂斷酒肉澹泊自處凡燕會皆不與而持論益堅據理守正每有功賞雖勅下必覆驗而後行設有詐冒必糾正之岷州

上官都指揮石能以家人冒功陞賞車奏罷所陞官能復請上宥之車反覆論其不可曰詐冒如能者非一人臣方次第按覈今宥能如餘人何若無功得官則捐軀歿敵者何以待之詔嘉車忠誠遣使賜白金四十兩文綺四表裏仍進其祿

二年以僉都御史盧睿叅贊寧夏軍務睿贊畫戎機行視險要增築鳴河州興武二城列置烽堠十餘所益廣屯種繕甲兵較士馬以固邊備而於軍民利病尤悉心焉

睿東陽人永樂辛丑進士

三年正月命僉都御史金濂叅贊寧夏軍務濂在任舉賢

國朝典彙卷五十五
用能人服其公置預備倉勸民出粟以賑凶荒軍民賴之
之又奏准靈州鹽課照例招商納馬每上馬一匹鹽一百引
中馬八十引給軍騎征候馬勾用照依馬價折糧而邊馬亦足

以丁璿為僉都御史督運宣大時麓川蠻叛令馳驛往視事
平錄功晉副都尋卒璿上元人為入官公餘猶手不釋卷
工部主事謫戍盧龍十餘年薦為御史歷任系著功績
自幼嗜學篤於踐履及入官公餘猶手不釋卷

四年二月戶部奏山東湖廣并直隸淮安等府俱差侍郎
巡撫總督稅糧近以事去乞仍命侍郎巡撫 上曰巡

撫為民而設苟非其人適以擾之今朝廷既無科差採辦之事
稅糧自有增置官員不必侍郎巡撫

十二月巡撫江西吏部侍郎趙新以九年還朝命蒞事南
京掌部

五年十二月鎮守副都御史程富上言五事一取涼州等衛被占空地
置房屋安軍一賣沒官田土買米上倉一精選勇敢全支月糧
加賞冬衣一令操練空閑軍餘可相救援一科舉不拘名數但文
可取者取之從之六年二月命僉都御史王翺鎮守陝西翺整飭
關隘操練兵馬舉用將帥三邊晏然關中以治明年以遼東守將



國朝典彙卷五十一 總督巡撫
屢失機勅翱往督之令便宜行事翱至詰責玩寇失機
故將初欲斬之因其叩頭祈免且未受已約束姑令戴
罪立功踰月射出巡邊自山海關直抵開原築墻垣濬
溝塹五里爲堡十里爲屯烽燧斥堠千里相望仍簡閱
戍卒措置糧餉邊用充足人樂於戰守

八年七月命刑部侍郎郭希璉清理鳳陽等府軍民

十年九月命刑部侍郎馬昂參贊甘肅軍務時都督王喜
玩寇失機卽劾其罪謫戍遼東官軍畏服先是赤斤蒙
古罕東等衛番族恣肆抄掠強劫總兵進貢馬駝昂受
命帥將士討之盡得主名梟首示及擒其僞初王鎖南
奔并妻子解送京師自是番人不敢近邊

三月河南山西巡撫侍郎于謙降大理少卿仍巡撫謙在
梁晉間年久上章舉叅政孫原貞王來以自代言官劾
其擅舉自代降職罷巡撫河南山西之民赴闕乞留復
命巡撫

十三年六月命刑部侍郎楊寧巡撫江西時閩浙廣東草
寇生發師征未寧江右密邇三境懼有侵軼患朝廷命
寧巡撫至則按視郡縣當賊衝者增修城垣立排柵以
斷要路團集鄉兵訓以武藝有侵軼者輒擊斬之賊聞
風畏避不敢犯於是時益鎮以簡靜暇則徧歷諸郡宣

上德達下情崇獎學校詢求民瘼而弛張之遠近畏慕十四年三月以御史韓雍爲僉都御史巡撫江西先巡按江西有聲吏民奏留再巡一年回京遂有是擢

九月擢兵部郎中羅通給事中孫祥竝爲副都御史分守居庸紫荆等關通政司叅議鄒來學爲僉都御史提督永平山海

十月改戶部尚書周忱爲工部尚書仍巡撫南直隸

按先是胡槩巡撫江南用法嚴刻忱濟之以寬凡告訐輒不省或面詰其不及胡卿使下情不能上達忱笑應曰胡卿勅有祛除民害語我勅但云撫安軍民朝廷委

任自異耳

十一月巡撫宣大都御史羅亨信鎮守宣府時土木旣敗邊城多陷宣府孤危旣而朝議復召宣府總兵官率兵入衛京師人心皇皇或欲遂棄其城衆紛然就道亨信不可仗劒坐當門拒之下令曰敢有出城者斬衆始定城中老稚懼呼曰吾屬生矣因設策捍禦督將士誓歿以守虜知有備不敢攻北門鎖鑰賴以保全亨信力也命以王暹爲副都御史守正陽門勅撫順天等府及鎮守山陵暹築立城堡奏罷被賊郡縣歲課物料民安之暹山陰人永樂戊戌進士官至巡撫河南右都御史

景泰元年六月巡撫雲南侯璉進兵部尚書先是貴州苗
 一 叛攻圍新添平越諸衛道梗弗通城中食且盡時普定
 一 圖尤急璉自雲南選善射者為前鋒自將至普定疾戰
 一 矢下如雨賊大敗圍解遂趨貴副總兵田禮等以兵來
 一 會克隆里甕城諸寨新添平越清平都勻諸圍俱解
 一 上嘉其功遂遷尚書又進克安莊堡長官司時暑雨方
 一 盛疫癘大作得疾昇歸普定卒 璉澤州人宣
 德丁未進士
 十一月以僉都御史楊信民巡撫廣東信民新昌人宣德
 一 間以鄉舉擢給事中陞廣東叅議嘗劾罷按察使被逮
 一 至京廣中數千人走萬里詣闕疏其公勤廉能乞留以

安百姓得復職適南海盜起命巡撫其地宣布恩威獎
 一 勵士卒屢戰屢捷撫歸數萬人卒於官廣人手香燈弔
 一 哭者幾萬人成化中謚恭惠

給事中李實等奏近年各處鎮守巡撫等官動經三五七
 一 年或一二十年室家懸隔患疾病而不能相恤子女遠
 一 違遇婚姻而不能嫁娶有子者尚遺此慮無子者誠有
 一 可矜乞勅各官議許其妻子完任量給本處官倉俸米
 一 以贍其家從之巡撫携家始此

命副都御史劉廣衡巡撫陝西廣衡至彼陳安邊禦寇利
 一 國安民急務十事多見施行督修城堡七十餘處

二年正月命僉都御史王竑巡撫兩淮諸郡時徐淮大饑民死相枕藉竑至畫救荒之術既而山東河南流民猝至竑不待奏報大發廣運倉官儲賑之近者日飼以粥遠者量散以米流徙者給米以爲道食鬻子女者贖還之共用米百六十餘萬石全活數百萬人以空庾六十楹處流民之病者擇醫四十人療之死者給以棺爲叢塚葬之窮晝夜竭精慮事躬理有所委任必委曲戒諭出於至誠人人爲盡力君子述其行事爲救荒錄云五月命直內閣侍郎江淵巡視淮徐諸郡淵條陳三事一淮之常盈徐之廣運諸倉俱在城外宜築月城以守之

一天津爲河北之會鳳陽爲中都之會宜放操軍以守之一河南爲中原要地北平爲京師巨甸宜選民兵以守命所司議行之

八月巡撫南直隸工部尚書周忱乞致仕以戶部侍郎李敏代之忱字量恢弘才識通敏蒞事精勤臨民和易有善謀者雖卑官賤吏破去崖岸開心訪納性尤機警籌畫諸郡錢穀鉅萬一屈指無遺算嘗爲冊曆記日所行事及陰晴風雨有告報輒按據詰訊人莫能欺每出會計視地豐凶事緩急爲弛張調劑變通民無逋負官有餘積前後理財者皆不能及

以刑部侍郎耿九疇鎮守陝西先是陳鎰鎮陝西慈厚清
慎悉民疾苦不作聲色專務安輯凡練兵屯田水利鹽
法事事各有經畫在陝十餘年教興政理每入朝民必
遮道送不忍舍比還歡迎父老及走數程久旱鎰至卽
雨雨久鎰至必霽人益愛戴之初薦按察使王文入內
臺正統景泰間文與鎰更出鎮至是文當出陝代鎰文
不欲行諷諸御史言已風采乞留內臺乃以九疇出鎮
陝西九疇至除弊屏貪威望大著又邊將請增臨洮諸
衛戍兵下九疇議言邊城士卒不爲少將官能嚴紀律
精練習勤撫恤絕侵漁養銳氣一可當百加以賞罰明

信人人自奮不然徒冗食耳竟不增戍

時議以鎮守侍郎與巡按御史不相統屬文移往來多窒
碍難於行事改爲巡撫都御史國朝初制歲遣監察御
史巡按方隅或大災重患乃遣廷臣行視謂之巡撫迄
事而止無定員也宣德中以關中江南等處地大而要
更命官更代巡撫不復罷去正統末南方盜起北虜犯
邊於是內省邊隅徧置巡撫官矣

三年以僉都御史李秉叅贊宣府軍務總督邊儲秉旣抵
任請銀三萬兩買牛給貧乏軍民耕種秋成償其價軍
民樂業邊餉充足時北虜以剽掠男婦易米朝議每大

口米一石小口米五斗虜不從秉曰是重物而輕人也
每口與一石或以爲碍例秉曰何忍使吾赤子爲夷人
耶專擅之咎吾任之悉如數與之後聞 上以秉爲是
命太子太保左都御史王翱總督兩廣軍務時南蠻寇兩
廣副總兵董興武毅觀望不肯戰巡撫侍郎揭稽李棠
不相統賊益熾于謙請用安遠侯柳溥總督兩廣軍務
如溥未可出臣謙及戶部尚書金濂左都御史王翱乞
用一人 上命翱往蠻尋平

按兩廣地勢接連休戚相關故景泰元年廣東黃蕭養
之變廣西曾動調官軍一萬之上前來策應及景泰三
年廣西有韋萬秀之變總兵武毅節奏協濟而廣東副
總兵董興不調兵應援彼此猜忌事多牽制及寇賊擾
攘而鎮將官互相觀望不卽勦捕朝廷更置其將簡翱
總兩廣軍務自總兵以下悉聽節制凡事得便宜而行
於是事權歸一而提督之任遂爲東南總鎮矣

四年正月改侍郎耿九疇爲副都御史仍鎮守陝西以左
布政使許資言與巡按御史不相統攝故也

十月以王竑爲副都御史仍巡撫督漕理鹽竑在淮上有
巡河御史王泯貪淫疏劾之謫戍連歲災傷竑上疏乞
罷 上嘉納引咎勅諸大臣修省被災郡邑賑濟

五年十月巡撫四川副都御史羅綺以鄉人秦受番金罷
官籍其家

天順元年正月上諭戶兵二部各處巡撫提督等官是
一時權宜添設今天下已定邊境無事宜卽將各官取
回其各處邊備并軍民事務令總兵等官理之事有不
便及官有不法者從巡按御史究治

四月逮大同巡撫副都御史年富下錦衣獄尋致仕富在
大同舉廢改革科徵抑豪橫廣屯田軍功爵賞必覈無
濫先爲卒吳淮所誣謂侵郭總兵坐總兵上于謙上議
曰穰苴布衣監莊賈軍以軍法誅賈卒破秦晉齊以一

穰苴故稱強列國裴度御史中丞督淮西諸大帥平蔡
我朝近日都御史王翱鄒來學皆坐總兵上以軍令出
翱等准妄言沮軍法宜究王者事雖寢富又嘗按山西
叅政林厚坐厚法厚亦誣富臺置獄訊 景帝曰厚怨
富執法公廉誣富得自便朕以邊事付富終不以一人
言辱富厚竟削籍富又按分守內臣韋力轉貪虐力轉
亦誣富巡按御史爲雪富誣狀事得已 是時石彪倚亨
勢中富危法逮詔獄 上問輔臣李賢曰年富何如賢
對曰行事公道在彼能革宿弊 上曰此必石彪憚富
不得遂其私耳賢曰 陛下明見真得其情遣官體勘

無實狀富遂致仕歸亨因此與張輓等固請盡罷各邊各省巡撫及提督軍務等官

調巡撫江西僉都御史韓雍爲山西副使雍撫江西有聲時有除舊補新之議故調之

二年四月復設各邊巡撫官初石亨等以文臣提督各邊軍務武臣不得自逞因請罷之未幾邊徼騷然上召李賢謂曰如今各邊革去文臣巡撫官軍縱肆貪暴士卒罷敝且曰朕初復位奉迎之人紛紛以此爲不便今乃知其謬也卿爲朕舉才能者用之賢因請曰遼東宣府大同延綏寧夏甘肅此六處須人最急上曰卿與

王翱馬昂商議推選務在得人於是議推十二人進呈遂定浙江布政白圭任遼東山東布政王宇任宣府僉都御史李兼任大同御史徐瑄任延綏山西布政陳翌任寧夏陝西布政芮鏞任甘肅巡撫其地上曰武人所以惡文臣者只是不得遂其私耳在任者卽遣使召還馬昂以貴州賊情甚急速請一人往理遂陞白圭副都御史贊理貴州軍務以太僕卿程信巡撫遼東召守制山西叅政葉盛擢僉都御史巡撫兩廣盛乞終制不允時廣西流賊多入廣東爲害而兩鎮將官不協各分彼此討賊迄無成功盛至請革兩廣守將立總鎮於

梧州居中調度則賊可平矣衆是其策而不果行盛不得已乃請益兵上命都督顏彪率兵赴之盛與彪協謀破賊砦八百所擒斬數萬人而還

以江西左布政崔恭爲左副都御史巡撫南畿恭至郡縣進諭耆老令人得盡言周知利病時米價貴乃出倉米而取其直以充義役費米價遂平

三年正月大同總兵石彪誣奏都御史李秉坐除名秉在鎮痛革諸弊凡剝削軍士者必置於法羣情洶洶度不能容乃以事中之

四月以河南按察使王槩爲副都御史巡撫陝西時歲荒老弱流移槩檄所司設法鳩集停逋負定民恃無恐

四年甘肅巡撫副都御史芮釗丁艱特命奔喪遣官營塋釗襄事還鎮已虜衆寇涼州甚急釗率輕騎馳赴分兵追勦所向克捷虜情遁去釗寶坻人正統壬戌進士觀政都察院掌院者器重之奏請選進士爲御史得二十四人釗其首也未幾掌河南道激揚有方考察明允當按遼東河南江西所至持風裁鋤強擊貪不少寬縱吏民畏服歷副使至督撫於練士卒謹斥埃精器械廣儲蓄尤盡心焉尋卒於官

三月召軒輓爲左都御史總督南京糧儲初輓致仕上

復思之遂召用輓嚴毅遇人無賢否悉峻拒不得接歲
時詣禮部拜表慶賀屏居一室撤燭朝服端坐寂無一
言鼓嚴出行禮禮畢竟御肩輿歸僚儕聞輓來輓避去
不樂與處南武庫郎沈琮嘗言留都大臣惟輓及魏驥
廉平俊偉不務文飾云

十月調遼東巡撫副都御史程信爲南京太僕少卿信巡
撫遼東建州酋董山通朝鮮受僞制爲中樞密使信廉
得僞制疏請先發伐其謀 上爲遣給事中使朝鮮及
錦衣譯官出建州董山匿不承出僞制示之皆愕懼乞
貢馬謝罪遼東總兵海寧伯董興倚曹吉祥姻又昵都

指揮夏霖恣不法分巡僉事胡鼎發霖奸賊罪四十事
信條上詔錦衣指揮郭英逮霖籍其家英得霖貨未減
霖左都御史寇深遂劾信惑外臺官瀆聖聽詔詰信不
肯引咎徵下詔獄調南用

命僉都御史韓雍巡撫大同雍陞辭召至文華殿賜鈔
上諭之曰善爲朝廷守北門雍精悍濶達有智畧時出
已意經畫防守城堡部署將校糾去奸蠹訓練士伍逾
年戎政大修虜不近塞

五年八月起前都御史王竑叅贊甘涼軍務時西師未解
而京師有變大軍未可輕出李賢請起用竑俾與兵部

侍郎白圭分道督兵禦虜竝等至邊虜引退

六年九月以項忠爲副都御史巡撫陝西先是忠爲陝西按察使適陝饑忠不待奏報輒發倉賑之民感其惠聞繼母喪軍民詣闕乞留詔奪服返任至是徵爲大理卿陝人復赴闕借留乃有是命

七年八月以山東按察使王越爲副都御史巡撫大同時吏部舉大同巡撫上諭李賢曰須得似韓雍者方稱賢以越對及越至陛見上曰王越丰姿是武臣之英邁者遂用之

八年十月調僉都御史葉盛巡撫宣府時盛以巡撫兩廣議事至京給事中張寧等合議舉盛堪入內閣盛在廣東時或讒於李賢曰盛自負能文訾公文不善賢啣之至是沮其進調盛宣府盛至鎮修復官牛官田之法墾田益廣積糧益多以其餘易補戰馬千八百餘匹其屯堡廢缺者力修築之不數月完七百餘所人謂邊臣留屯屯種者無如盛云

成化元年三月以河南布政使王恕爲副都御史撫治南陽荆襄三府流民時南陽豪民爭礦殺人恕至獲其巨魁散其餘黨俄內艱去會襄陽盜起旋起復勦盜以宋傑爲巡撫蘇松都御史尋致仕傑定興人性和厚質

實而量有容居官能行所無事人皆以鎮靜稱之

四年四月總督兩廣副都御史韓雍請廣東廣西各設巡撫從之

五年十一月設總府於梧州府總制兩廣地方時都御史韓雍以憂去兩廣賊勢復張僉事陶魯言兩廣地勢猶一人之身今軍政分而爲二以是賊人寇掠無任其責者乞勅大臣總督如馬昂葉盛韓雍故事庶事體歸一巡按御史龔晟亦言宜立總府於梧州簡命大臣兼制兩廣則事統於一而責有歸兵部亦言兩廣互爲唇齒廣東藉廣西之兵力廣西藉廣東之糧儲今巡撫等官

名位頡頏議論之際甲可乙否宜如魯等所請 上召兵部會官議舉起復韓雍爲右都御史總督兩廣軍務兼理巡撫

六年二月吏部尚書姚夔等議陝西山西山東湖廣荆襄兩廣貴州南北直隸俱有巡撫都御史江西亦有撫民按察使趙啟雲南多係土官衙門不必遣官惟河南四川浙江福建及直隸大名等府無巡撫官擬各堪爲巡撫者 上命刑部侍郎曾鞏往浙江原傑往河南滕昭往福建黃琛往四川宋旻往大名今召趙啟還京待缺夏時正往江西召湖廣巡撫羅篴掌南京都察院事以

吳琛代之

七年四月僉都御史徐廷章以巡撫甘肅歲久警怨者多
乞別調 上曰巡撫官但行事公正何必論久近廷章
所言乃適已自便不允令盡心所事不許推避

八年九月給事中梁璟言畿內八府境土廣遠巡撫一人
兼理邊備卒遇有警恐悞事機乞以河間保定以南六
府專委都御史陳濂巡撫其範州抵密雲一帶邊關及
順天永平二府屬另擇重臣一人專督兼理巡撫之任
部覆從其言乃以命都御史張綱二巡撫之設自此始
九年命左都御史王越率兵捕虜於河套搜套搗巢斬虜
首二百八十加太子少保還掌院事

十二月刑部主事張鼎上言臣生長陝西比見邊務日殷
水旱繼作謹陳事宜以備採擇其一曰陝西八府三邊
腹裏俱有鎮守總兵巡撫都御史等官不相統一遇事
各爲可否有警不相援救宜推文武兼濟者一人總制
三邊副將以下悉聽調遣則事體歸一又言固原平涼
乃三邊總會之所虜寇侵犯累從此入宜置立總府諸
臣會議乃命左都御史王越駐劄固原總督諸路軍馬
陝西總制始此

十年以張瓚爲副都御史巡撫四川時播州大瀾灣溪等

所累朝未服瓚督師進攻拔十六寨諸苗望風納款降其衆萬三千人置官司控制之已聞母喪行會潘茂西寇邊詔奪情征勅下任昌等四十五族惟西坡等處負固如故進兵破其七寨增設墩堡數十處事竣拜戶部侍郎懇辭終制瓚孝感人

二月免各處巡撫都御史赴京議事

二月鎮守廣西少監黃沁許奏總督韓雍坐視猥賊出沒隱匿不報以致斷藤峽賊復嘯聚滋蔓流劫郡縣上免雍罪命致仕雍在兩廣威令素行沁不得恣其欲布政何宜迂而固副使張敷貪而暴不爲雍所禮乃與沁

攻訐之及差官往覈適委宜敷行勘竟成其罪

八月起都御史張瑩巡撫保定時值久旱給民牛種俾不廢業復承勅勾稽戎籍王師出督軍餉不乏

十一月致仕鎮守浙江兵部尚書孫原貞卒原貞本名瑀以字行德興人卒年八十七居官以清慎自守多著勞效令終壽考亦世所難得云

十一年七月改張瑩巡撫大同瑩至斬首虜奪兵械築城濬濠清理屯種復被勅褒諭虜酋亂加思蘭知有備請入貢具奏許之

十二年三月命副都御史朱英總督兩廣兼巡撫兩廣用

兵以來戎帥喜邀功每有小寇輒張大賊勢覲用兵得成其私英深知其弊下令撫綏猺獞各安生業約束將士寇來在守不許輒進兵諸峒岷有猖亂者購首惡誅之而釋其黨

六月巡撫遼東副都御史彭誼乞致仕從之誼東莞人在遼十年嚴武備實倉廩鎮靜有威自小黑山之捷虜後遠遁不敢犯邊東方無事時總鎮太監橫徵諸屬衛誼乃令所屬衛凡移文不經本院議處者皆令覆請違者以軍法從事虐焰頓息邊人德之

九月雲南巡撫左都御史王恕奏帶男王承祿隨侍從之十一月撫治荆襄左副都御史原傑慮新設郡縣漫無統紀薦御史吳道宏代任上以道宏爲大理少卿撫治三省八府州縣尋改僉都御史

十二月巡撫遼東陳鉞奏乞賜勅執問都指揮以下官上曰人臣不得專擅威柄雖有一時假以權宜者非祖宗舊法也陳鉞欲請勅自都指揮以下徑行執治是欲專擅威柄邪所請不允

十四年以王沂爲副都御史巡撫真定等處沂武進人吏部尚書僉子嚴毅謹恪天性孝友生平自處儉約家雖富無貴侈態人謂有父風云

起僉都御史高明討上杭賊事平卽上疏乞休去嘗曰孔
幾三宜去司空圖三宜休吾無才一宜退有病二宜退
親老無兄弟三宜退及治盜徵宐起賊平疾作宐再退
自稱五宜居士明貴溪人景泰二年進士天性孝直俊
暢有通才難進易退出處皦然

十二月兵部尚書余子俊言兩廣夷民襍處叛服不常往
緣鎮守巡撫等官頡頏不一故設立總督之稱使上下
協和易於控制比因朱英與總兵官平鄉伯陳政爭坐
遂革去總督之稱竊見英自受任以來悉心所事招撫
安靜大有成功今忽解去總督之柄恐諸夷輕視反側
復生且太監顧恆總兵官陳政亦皆有功俱請表處

上曰國家懸爵賞以待有功誠所不吝但不可以冒濫
朱英顧恆陳政既有招撫勞効邊徼靖安英陞右都御
史仍總督兩廣軍務恆政各賜金幣降勅獎勵

十五年四月致仕總督兩廣右都御史韓雍卒謚襄毅雍
吳人自幼英邁不群爲御史時年甫二十一出按江西
刁豪歛迹其所規畫多合事宜歷陞僉都御史巡撫江
西年末三十練達吏治曉習人情黜奸貪疏冤滯均徭
役平市價恩威大著凡所注措後按爲格例他巡撫不
能改天順初調山西副使坐累致仕尋復起巡撫大同

七年還議事 上喜雍狀貌陞兵部侍郎已左遷浙江
叅政成化元年以王竑薦陞僉都御史贊理兩廣軍務
晉右都御史致仕歸家居四年卒年五十三雍明經讀
律洞達凱爽篤於孝友與人交有信義不爲峴谷臨戎
蒞政豹變鵬搏雖發奸摘伏而事簡心平每有惠澤江
西嶺南莫不畏如神明愛如父母摘詞灑翰風生泉湧
天才逸發

十月命都御史陳鉞叅贊東征軍務初建州之役其謀實
起自鉞而王越亦有垂涎之意余子俊以越開邊啟釁
惡之 上命汪直朱永將兵而不及越越疑子俊所沮

乃言本朝未嘗有武職節制文職大臣者且征討重務
豈可無文臣總督意蓋自薦子俊言前命出於聖斷不
可復移今鉞自以風憲大臣不受節制故爲阻撓宜勅
其協濟同謀無分彼此而鉞以直故且以計沮王越竟
得叅贊之命時稱越鉞相競云

十七年六月逮陝西巡撫副都御史秦紘下獄尋釋之命
巡撫河南紘爲南京御史劾中官降北黃驛丞薦知雄
縣又禁中官捕獵被誣禍幾不測民數千走擊登聞鼓
訟寃得調歷陞巡撫宣府再撫陝西時秦府旗校肆橫
苦軍民紘悉擒治不少貸王不能堪訐紘凌親王 上

怒逮紘詔獄命內臣尚亨籍其家得黃絹一疋故衣數
事亨還言紘貧狀上親閱其貲嘉歎良久立釋紘且
賜鈔萬貫旌其廉巡撫河南會汪直至上他巡撫率屈禮
紘與抗密疏直多帶旗校擾地方直還上問各省撫
臣賢否直獨稱紘廉能上出紘疏示直直頓首伏罪
益稱紘賢不置上乃釋直

十九年正月命刑部侍郎何喬新巡邊時馬亦思因擁眾
寇大同殺邊將紫荆居庸告急勅何喬新巡邊遣諜覘
虜營聲言遣兵搗其巢虜懼不戰遁去時山西饑人相
食卽命喬新賑贍得便宜行事喬新請內帑准鹽銀及
鬻祠部僧道牒得粟數十萬石分部賑恤又餽饑人疏
溝渠出粟償直凡活人三千萬

九月巡撫甘肅僉都御史王朝遠累乞致仕許之朝遠在
鎮常輕騎巡邊考卒精壯者千餘補各屯增修屯堡擇
廉吏主市平其物價彼此獲利夷人大悅

十月起馬文升爲左副都御史巡撫遼東初文升爲汪直
陳鉞所陷逮獄謫戍許中至是直鉞既敗文升寃得雪

詔復其官致仕尋起用之

二十年四月起浙江按察使楊繼宗爲僉都御史整飭永
平山海等處邊備兼巡撫順永二府時外戚宦官庄田

多占民間地土繼宗奪而還之權貴歛迹
以大理卿宋旻爲右都御史總督兩廣軍務旻淳安人爲
人厚重接物詳慎謙抑在棘寺年久以仁恕稱及在兩
廣承韓雍平定後號稱無事旻亦以靜謐鎮定之

七月以貴州左布政彭韶爲右副都御史巡撫蘇松嘉湖
等處韶繼王恕後鎮之以靜吏自不敢犯科而民益樂
其豈弟

十一年二月復命戶部尚書余子俊兼副都御史往宣
府大同等處總督軍務倉場尚書殷謙兼理部事侯子
俊遂日各仍舊時宣府巡撫李岳等奏連歲兵荒軍民

因極今東作方興恐言者仍以修邊爲事未免動衆妨
農乞暫停止以待豐年事下兵部尚書張鵬等以爲差
官修邊已有成命請自聖裁詔令子俊至彼酌量處之
九月調撫治南贛僉都御史閔珪爲廣西按察使珪疏盜
賊之作皆巨室是由欲捕坐之仍革豪右橫取之弊京
官多不悅會李孜省得幸因言珪不勝任左遷之
改撫治鄖陽都御史劉璋巡撫四川四川乏糧儲時有例
許農民入粟補吏璋命有司聽其納銀且減其數旬日
間得銀數萬兩而至者亦多隨給以平糴歲足軍需仍
餘米八萬餘石

二十二年給事中劉昂等劾奏都御史余子俊取民無度
用財無節國家賦有定制今則創爲預徵邊有常供今
則索於額外借漕運而京儲因之不充急挖運而京民
爲之擾動報虜警而勢多虛張修邊防而財多妄費雖
侵欺之情未露而妄費之責難逃乞明正其罪以爲妄
費邊儲之戒御史朱欽等奏子俊往在陝西繕修城堡
疏開河湟虛張聲績邀獲時譽遂蒙拔自疎遠置諸六
卿增其職任委以邊寄昧於審時急於功利乃於凋弊
之餘輒興城堡之築事不酌其可否功惟幸其必成遂
致邊備空虛群情嗟怨此而不懲何以警後 上命該

部議其事以聞旣而命工部侍郎杜兼等勘報還奏以
爲子俊在邊未及二年費用官銀百五十萬餘兩糧料
二百三十萬石雖因供給軍馬修築墩臺置造兵器皆
出公用然亦勞民傷財不爲無罪復下戶兵工三部會
議覆奏 上曰余子俊受朝廷重託不審事勢偏執已
見處置乖方費用錢穀數多姑置不問革太子太保令
致仕去

十月巡撫陝西都御史鄭時上言利國保民五事一盡誠
敬以回天意二明理義以杜妖妄三減進貢以蘇民困
四息傳奉以抑僥倖五重名器以待有功專爲梁芳發

也謫貴州叅政弘治改元起原官撫治鄖陽

二十三年五月以副都御史王繼巡撫福建福建自成化十五年上杭盜起停巡撫至是因海寇發故用之

七月巡撫甘肅副都御史唐瑜被劾免甘肅兵政久弛瑜至則陳時政四兵備五罷叅將田廣奏起才將許寧李璵勞邊軍恤陣亡邊人竦然會中貴人以事諷瑜不從廣等媒孽之竟坐事去弘治五年詔復故官致仕

以羅明爲副都御史巡撫甘肅明奏罷貢獻以息橫歛復奏奪勢家所擅草湖之利以還軍士他如均水利清兵馬蠲逋負多所建明弘治二年卒于官已以區畫哈密

功徵爲工部侍郎已不及矣明南平人成化丙戌進士弘治元年正月命右都御史屠濬總督兩廣濬以親老乞終養不允留廣東一年斬獲猱獍數百賜綵段銀兩柳州諸戎軍舊番調風土殊習比歲歿亡過半乃爲區處分守多所全活

二月以廣西按察使許進爲僉都御史巡撫大同先是北虜小王子擁衆深入欲爲寇旣又以人一千五百入貢進於初至請發內帑銀二萬以供館穀之費邊人不擾及虜使入進防範嚴待遇厚而所以臨視之甚整肅人以爲得體

八月擢湖廣按察使楊繼宗爲僉都御史巡撫雲南尋卒
繼宗陽城人好善嫉惡與人不苟合先爲嘉興知府止
携老僕一人蕭然旅寓九載考績民老幼遮道留之不
忍捨去陞浙江按察使憲綱振肅初藩臬諸司所用咸
辦於下鎮守中官供給日費萬錢一切革去之巡撫順
天爲權貴所忌成化乙巳星變上疏左遷雲南副使既
復巡撫雲南居官三十餘年剛直廉介之操雖庸人孺
子皆知其名云

以陳金爲副都御史巡撫雲南時孟養爲邊患數十年金
遣人省諭卽輸服歸侵地下三處又合貴州兵勦平夷
賊米魯等修復滇地水利灌田數千頃以至屯田馬政
軍器多積弊盡搜剔之

二年十一月巡撫宣府僉都御史孫珍卒於官珍有直節
不究其用人多惜之

以王詔爲巡撫雲南副都御史飭守禦嚴斥堠復以孟密
亂招集有功再荷褒諭奉詔錄囚躬冒危險觸炎瘴平
反甚衆四年赴任南京病卒詔趙州人天順八年進士
儀觀魁岸坦衷夷節自處不苟歷官顯要清約如寒生
卒時無子弟在側官屬爲治後事囊無長物

四年正月安遠侯柳景鎮守兩廣貪暴不法總督都御史

秦紘具列其狀劾之逮景下刑部獄抵法追贓鉅萬襦其爵景求援於壽寧侯內降減其贓且撫他事誣紘以圖報復由是紘亦被逮坐免既而景贓銀追及八百兩詔免其餘刑部尚書彭韶爭之不聽

以徐恪爲副都御史巡撫河南時旱溢交沴請減秋稅省織造折鹽課有藩府據魯山民業承命會勘議歸之民戶部督積逋急以災變請緩其事民德之終工部侍郎七月巡撫大同副都御史許進劾太監石巖貪暴巖撫拾中傷凡二次差官勘問無實竟以擅用前官所遺藍絹旗謫知兗州府

五年以鄧廷瓚爲副都御史巡撫貴州廷瓚初爲淳安知縣問民疾苦專施惠政不求赫赫名終九載無知者兵部尚書張鵬時巡撫廣西知之薦知梧州府會母憂去起知程番府悉心規畫政令公平四境晏然蔚如中州尋擢巡撫適黑夷久叛勅廷瓚討平之

詳苗蠻

七年七月以陝西按察使許進爲僉都御史巡撫甘肅用馬文升薦也

八年三月以副都御史韓文巡撫河南值懷孟以北旱饑令所司發銀賑貧復竭誠雩禱致雨歲乃大熟四月改張敷華巡撫陝西時有妖僧據山中爲逆朝議且

用兵馬文升曰張都御史能了此不數日敷華授計山中父老果縛妖僧至

六月巡撫湖廣都御史樊瑩疏奏地方利病下部議行之時錦田賊與兩廣猺獍爲寇聚衆幾三萬人瑩謂賊如此理不可盡殺使不開其生路將致死於我乃下令除首惡必擒餘悉貸不問賊聞之稍各散去遂得倡亂者十八人置之法而馘其餘歸本貫兵不血刃一方以寧於時巡屬水旱連二十州而諸藩府繕修未息公私困弊衡州等處且乏鹽瑩奏通廣鹽收其餘利以助工作給賑濟又奏停綾紗紙銀數十萬兩

七月以朱瑄爲副都御史巡撫南直隸瑄出帑財糴穀萬斛以備賑應天蘇松等郡旱潦艱食奏減歲額淘三江下流殺湖水濬孟瀆等河通漕舟自蘇州至崑山太倉多作長堤樹以柳木甃石通舟楫風濤盜賊之患乃息議建太倉州請割崑山常熟嘉定附近鄉都隸之疏罷州郡增派物料蘇上元江寧雇直裁省內府各衙門供給及運送人夫等項凡累鉅萬又除各縣無徵糧若干議處蕪湖權課清江北驛站奏減蘇松常杭嘉湖六府稅額寬恤民力民皆誦之瑄鄞縣人成化己丑進士少孤力學辨義利最析齒及賄賂則喞然見顏色故剔歷

中外幾四十年家無餘蓄歲凶缺食郡大夫以米四十斛爲餽一無所受其卒也市人歛錢櫬之清介重當世八月詔設巡撫於南贛自弘治甲寅汀漳奸民合爲寇其始甚微郡縣有司無遠畧不急捕其勢寢熾而嶺南湖湘之不逞者從而和之四出剽掠劫富室燔民居掠帑藏殺官軍閔然爲東南患有司始駭而圖之備其東則發於西剽其南則竄于北時鎮守江西太監鄧原暨撫按三司議謂盜之未平以政令不一而隣境有司不肯協心故也宜設巡撫憲臣置司要地以節制之而割附近郡縣隸焉則盜易平具奏其事 上從之

十月以副都御史徐廣巡撫湖廣時親藩之國宦豎怙載鹽百餘艘抑市於民恪立捕其首寘於法禁其鹽境外无卜人不得行其私者百計譖毀之 上不行八年以唐珣爲右都御史巡撫兩廣時南蠻弗靖珣督兵進勦破村寨巖洞百餘斬獲萬計捷聞賜勅獎勞未幾卒珣華亭人

九年九月巡撫順天都御史屠勳以近畿役重民貧京邑尤甚疏請裁省夫役昌平密邇山陵供億浩繁疏停牧馬以示優恤其經畧邊備奏分薊州三路屯兵緩急相援於潮河川築城設險居守及增置黃花鎮營壘戍兵

國朝典彙卷五十五
總督巡撫
聲勢聯絡虜不敢輕犯至今賴焉又奏徙熊兒峪馬營
於便地就水泉人免病渴猪圈頭關沮洳多水患歲苦
修築亦奏徙之

十年以張玉爲副都御史巡撫遼東玉謹斥堠嚴烽燧敦
信義軍士以守備爲本而不言攻戰有微求以希爵者
正色厲言拒之中外方倚重堅乞致仕歸

三月召前左都御史王越入見加太子太保命總制陝西
三邊軍務經畧哈密先是越奪爵謫居安陸弘治改元
詔放還鄉尋以黃緣壽寧侯復職致仕至是起用之

五月起丁憂副都御史何鑑巡撫山東山東南北要衝

遞夫水馬夫閘夫溜夫驛夫壩夫泉夫守堤守橋等
役歲計四五萬人官府濫增吏緣爲弊民不堪命乃度
州縣繁簡酌里分多寡分派夫役立爲定規臨清德州
倉場權貴攬尅納充巡捕官兵倚勢害民悉擒治隸戎
籍者數十人

八月召陝西巡撫都御史許進爲戶部右侍郎進在陝西
因州縣徵納公事人役投牌三司皆苦於科罰畱難進
至間以牌呼訊之革其弊因廉守令臧否軍民利病上
下肅然藩臬出巡多應故事進著令凡巡歷所部期十
日州縣期三日逐日自籍行過政績回則憑籍稽其勤

情至是守巡多留心民隱進繼張敷華後關中有張明鏡許重磨之謠

十一年十一月以王越總制寧夏甘涼軍務十二月加少保尋卒越濬縣人景泰二年進士初爲御史有名超陞山東按察歷官兵部尚書兼都御史以功封威寧伯贈太傅謚襄敏越姿表奇邁慷慨自許論議英發見事風生久膺師寄身經十餘戰出奇取捷慮成發中顛倒才智柔馴辯強皆樂爲之用效之者皆以自爲不及巡撫寧夏副都御史韓文卒文保定新城人器宇宏濶以平易爲政未嘗肆苛猛立聲譽時人稱之

十二年八月以副都御史雍泰巡撫宣府泰剛明正直不附權勢先任浙江布政民多販私鹽泰先收勢家治之衆遂息故推任之至宣府有叅將李稽不法部下狀其惡泰具草將聞於上稽跪堂下乞受責圖自新泰曰此亦軍法也縛下杖之三軍股慄已而稽譖泰於時相而言官遂劾其擅辱將官罷退居韋曲別墅不涉城市十三年三月總督兩廣左都御史鄧廷瓚卒兩廣自成化初韓雍平寇後開府梧州率以憲臣有才望及官高者總督軍務兼巡撫廷瓚性不瑣瑣思安靜爲治屬吏有賢者輒薦舉或不職特去一二太甚者奏除諸冗吏曰

祿俸少於民徒費顧群蠻以劫掠爲常往往出沒閩楚諸郡廷瓚言都御史金澤巡撫偏方非宜宜以江西一省付澤使二司聽節制庶軍馬錢糧可以調度其湖廣衡州設兵備憲臣遷治所郴州便又以廣東瀧水爲賊巢宜卽其地設千戶所調軍守禦仍宜給隙地屯種爲久計廷瓚以群蠻結以恩信兵不輕出出則成功若鬱林川雲鑪大桂諸種作亂以次討平其後四會諸下縣一饑盜竊發勢尤熾廷瓚斬獲首惡李景光覃傑及其黨二百餘人餘悉解散歸農廷瓚歷官處事求濟待人可疑雅量廓如莫窺其際至所設施動中機宜其中明炳人莫能及卒贈太子少保謚襄敏

五月起養病戶部侍郎劉大夏爲右都御史總督兩廣勅使臨門卽携二僮以行兩廣人士聞其來如饑兒之得乳母至則旌賢才斥貪穢裁冗費便役法凡上下不便者一切正之

六月總制三邊戶部尚書秦紘在三邊整花池鹽課買馬開豫望城屯田先後斬首九千修城堡關窖一萬四千所剷山崖三千里是年乞休不允加太子少保尋革總制召還部辭得致仕

十月巡撫大同副都御史洪漢以邊師失利被劾關任



十一月命工部左侍郎史琳兼僉都御史經畧邊關琳首
陳謹邊關以防衝突五事九載秩滿擢右都御史時虜
寇猖獗朝廷方命將出師衆遂舉提督軍務已而報稍
緩命先赴宣大會計兵馬芻糧虜退還京命蒞院事
十四年二月以南京鴻臚卿陳壽爲僉都御史巡撫延綏
時火篩侵犯劇甚邊堡失事鎮城晝閉壽兼程赴任先
卹陣亡官軍隨易諸路將領兩旬間與虜戰三勝虜知
有備遂渡河北遁同事者諷壽注子弟姓名戰籍中當
有功賞壽曰吾子弟皆不諳弓馬竟不許時論賢之
六月以副都御史王鑑之撫治鄖陽鑑之蒞任力除貪酷

時有不堪者乃自草疏投於所厚近侍者謂撫治之官
古之所無今之暫設者也欲取回京時有待選士效借
寇故事并疏政事謂一日不可無此官奏聞寢其事

十月起戶部尚書秦紘兼副都御史總制陝西固原等處
軍務初南京守備魏國公徐溥特疏紘可當邊關重寄
直北虜犯固原等處特起紘總制明年特命照王越仍
仍總制陝西延綏寧夏軍務巡撫而下咸聽約束遂爲
定制

以汪奎爲右副都御史巡撫貴州奎婺源人性簡靜尚氣
節不妄取與居官以篤實從事耻務奔競雖無時譽其


自守有足稱者

十五年五月江西盜起勅都御史林俊巡視江西兼督軍務俊至榜示許盜自新抵新昌親入賊巢賊首王五率眾出營擒四十餘賊自效賊黨解散遂改巡撫庶務一新尋以憂歸江西人皆攀轅不忍其去

七月以副都御史孫需巡撫河南時河溢且嚙汴城民流移載道乃議使役以築堤而予傭錢令出趨者萬計墾成而饑復濟公私便之羣盜橫行令督兵巡捕先後獲數十人復取其贓散州縣以充給濟之費他若讞獄平賊鋤強植弱孳孳在念民所便不便皆以入行

八月以右副都御史畢亨巡撫甘肅清出匿占軍士三千人又簡餘丁為邏卒莊浪有警踰時城晝閉乃率師直抵城下開屯於郊令士卒樵牧有餘芻官給價以充儲峙軍威大振虜遁去

十六年二月命南京刑部侍郎樊瑩巡視雲貴二省時年幾七十矣單車屏從躬訪利弊雖險阻瘴癘人跡所不到之處一一履行奏劾鎮守及巡撫官罪狀黜不職文武吏數千員修城池勵兵馬賑貧窮撫流散威惠大行有為奪其牛不還者聞瑩至走愬之瑩還其狀曰汝弟歸彼今歸汝牛矣已而果然且詣瑩服罪慰而遣之他



土官聚兵仇殺且攻城有司不能制以白瑩瑩曰吾在賊敢爾耶不去當直搗其巢穴舉其族覆之聲聞卽歛兵退其爲蠻夷畏服如此

十二月以副都御史張本巡撫江西時袁瑞聞盜發特榜示之諭以生殺利害盜遂逃散地方以寧凡百設施一從寬厚而周窮濟急伸冤理枉惟恐不及蓋本守吉時威名素著故民懾服自不敢犯本錢塘人性剛介遇事敢爲無所顧忌而清操苦節始終一致

巡撫貴州僉都御史劉洪奏平黨惡普安阿方車等初王軾旣平女苗米魯而阿方車等竄逸山寨拒命洪追劾先守臣邀功啟釁之罪削奪恩蔭遂練兵誓衆檄宣慰司世榮父子指授方畧協力効命草薶而禽獮之一境始平又議增築新興平夷所諸要害城郭定夷民姓氏黜官吏貪鄙凡興利除害事宜悉次第行之功上賜勅褒謂尚書劉大夏曰劉洪會幹事蓋上以大夏薦之也尋改巡撫四川討平松茂番夷

十七年改陝西巡撫副都御史周季麟巡撫順天御馬監及京營草場地土之在薊州者與民產錯置屢屢互爭密諭內閣擇大臣勘處必得其人廷推季麟素有才聞遂特召還巡撫言官劾其移鎮有夤緣意累辯

求去不允尋以養病歸逾十四年卒贈都御史謚僖敏
改河南巡撫孫需撫陝西鎮守中官劉瑯與需水火剝民
自殪輒以法裁之有奸民違例赴瑯投愬牒者必據法
配之荒裔瑯嘗謁請於需曰瑯不能學公廉盍稍縱繩
墨使瑯得飲勺水以相安於此耶需心知瑯必害已亦
不爲動日夜圖陰中需大臣之子有怙勢橫於其鄉者
需亦裁以法於是瑯計得行會陝西缺撫遂移之蓋大
臣亦不欲其久于汴也

五月加總制三邊秦紘太子少保紘在鎮修三邊與其
裏城堡關隘萬四千一百九處剗崖設險三千七百餘
里自是北虜不敢窺伺時固原城市荒稀民貧乃拓其
外城奏移批驗所于此由是商賈流通公私兩利又創
修孔廟廣學舍詩書之化人才彬彬相繼出矣在任三
年邊功孔多

正德元年正月以僉都御史楊一清總制陝西三邊軍務
一清以寧夏花馬池係要害地虜數由以入李官屬沿
邊巡視計處方畧興築邊牆明年以忤劉瑾罷

八月起副都御史林俊再撫江西時各府地方盜賊蜂起
肆行劫掠從人望起俊

二年巡撫鄖陽副都御史汪舜民卒舜民婺源人有才畧

平生矯矯以風節自勵至老猶不改其操云

四月遠巡撫南畿副都御史艾璞下獄

八月以副都御史陳金總督兩廣時馬平獍賊猖獗親統十三萬衆直抵賊巢平之省諭古田賊酋歸侵疆輸誠如他州縣又斷滕峽賊積久爲梗金諭服之俾通江路無過往來上其事賜名永通峽

十一月取回天下巡撫官

詳中官

三年二月起前都御史雍泰提督南京操江先是馬文升劉大夏交薦之及給事中潘鐸等復疏泰有敢死之節克亂之才許進薦於瑾瑾以同鄉故起之鄉人諭泰謝

瑾泰曰進退在天若奈我何

四年十月虜殺總制三邊工部尚書才寬陝西三邊自楊一清罷遂革總制比北虜猖獗復用寬寬好野戰不拘戰陣略一切裁決自將值大虜在套率師由與武營擊之斬首數十級狙勝深入忽伏兵起中流矢歿於陣事聞廢子錦衣百戶世襲

十一月以都御史陳金總制江浙閩廣軍務討平江西諸盜加太子少保

五年八月以楊一清總制陝西三邊諸軍事

按都御史總督軍務自正統四年麓川之役王驥始也

總兵官悉聽節制驥以兵部尚書師師當王振好大之心遂擬糧儲故事糧儲稱總督宣德中始也繼是而已已之變虜薄都城石亨營城北于謙督之孫鏗營城西則江淵叅之而已繼是而四方多警類率如例如馬昂於兩廣石璞於關外王來於湖廣侯璉於雲南然事平則罷又繼是景泰天順及成化初白圭葉盛韓雍等皆稱提督意屬協同勅名贊理又繼是則爲任官矣成化六年開總府於梧州此任官之所由始也三邊總制自弘治末年秦紘楊一清張泰始又繼是而陳金華陽之役陸完劉六七之役至統制七省故近乎海之役亦援

以爲例云

巡撫寧夏都御史馬炳然丁憂不補其缺令總制楊一清專在寧夏居住撫馭蓋陰奪總制之權也炳然內江人已以督南京儲至武昌青山江中遇流賊劉六爲所挾令作書退軍不從遇害妻女俱溺歿贈右都御史謚殺愍

七月四川巡撫林俊乞致仕許之時宦官用事每各邊征勦必以其子弟私人寄名兵籍冒功次陞賞俊一切拒絕權幸惡之且與總制洪鍾議多不合因乞歸內批允之時蜀賊尚有餘黨科道保留不從俊歸蜀人號哭追

送未幾而兩川逋寇復熾殘破蜀土人民益遭荼毒矣以馬中錫爲右都御史督軍務討劉七楊虎等戰於彰德鎮斬賊甚衆陞右都御史掌院事寇奔入山西數月後還有軍數萬我軍不能遏以老師玩寇被劾徵下獄明年卒中錫故城人初爲給事中時憲廟萬妃之弟恃寵驕恣上疏發其奸被杖幾死再疏再杖不爲阻悔歷官遼東巡撫兵部侍郎以忤逆瑾罷官復以違糧腐損過多逮下詔獄褫職爲民竟卒於獄後御史盧雍追訟其寃詔予一祭

十月巡撫山東都御史邊憲真定都御史蕭翀以遇流賊失機逮下獄除名爲民

六年以劉琬爲副都御史撫治鄖陽琬宜春人器貌端重爲政矜嚴持大體曉達民事慎飭名檢所至舉其職七年二月巡撫山東都御史張鳳急選民兵各令自買馬團操挑挖坑塹督責布政二司官尅期完辦巡撫真定都御史甯杲召募無賴數千衣甲器具取給州縣事煩民擾之害過賊之半巡按山東御史張璿真定人憤不能平奏論谷大用陸完等師久無功鳳等募兵地方受害疏下都察院都御史王鼎奏乞令兵部差官勘究尚書何鑑護短不行

十月命都御史陶琰總諸軍務事巡視兩浙初廷議以河北賊并桃源諸賊未平故復勅琰總諸軍務事至則劉六已殄滅王浩八已聽招撫人心甫安而寧紹瀕海屬邑颶風大作海堤毀者三百里居民漂溺者以萬數琰聞之憂甚乃親按其地亟出帑銀多方賑救遂生萬餘人仍委官築堤捍水自蕭山至餘姚凡五萬餘丈琰憂桃源賊譎詐難信乃奏設兵備及簡拔郡寮之有才者分守要害處置周悉

十二月四川麻六兒等賊久不能平巡按御史王綸劾總制洪鍾縱賊殃民以不職罷以右都御史彭澤總制四

川軍務

致仕巡撫應天副都御史艾璞卒璞南昌人居家孝友立朝持正晚值逆瑾庇勢家中禍瀕歿播遷及瑾誅且復用之而遽以訃聞君子惜之

八年二月巡撫四川都御史高崇熙以盜不盡滅逮詔獄四月起副都御史陳壽巡撫陝西時科道交章薦壽以守正忤逆瑾受害貧不能給朝夕吏部尚書楊一清素知其賢乃起用之

九月以右都御史彭澤總督甘肅等處軍務經畧哈密十年以張津爲副都御史巡撫應天以征孝豐賊有功加

戶部侍郎巡撫如故尋卒於官贈尚書津博羅人歷官清謹練達吏事而自守嚴正所至有聲望云

九月巡撫江西右都御史俞諫因構怨宸濠具疏乞休濠營內旨奪其官閒住

十月以河南布政孫燧爲副都御史巡撫江西時宸濠潛謀不軌燧日謀所以制之於是均征賦飭戎備實倉儲撤鹽利諸凡椎剝黎萌者漸次剝削偵姦黨置之法以剪其羽翼

以右都御史陳金加太子太保總督兩廣軍務金念兩廣久用兵民困瘠不忍更以兵事累地方疏復鹽利開鑛治佛山堡收稅以充軍興南雄民遺虛糧七千餘石征逋方急金別覈橋稅以代供潮州所轄多逃移逋賦亦五千石則檄餘鹽補之減省供費一意拊卹

十一年九月以南鴻臚寺卿王守仁爲僉都御史巡撫南贛汀漳等處先是南贛撫鎮屢用非人山谷克民初爲偷竊攘奪至聚徒爲盜漸至擄劫鄉村焚掠州縣肆無忌憚遠近視效凡在虔楚閩廣接壤山無非賊巢有司束手無策兵部尚書王瓊獨知守仁特薦用之

十月總制都御史彭澤削籍爲民時兵備副使陳九疇敗土魯番於肅州土魯番陰遣使寫亦虎僊以秘術干進

得預養子之列知兵部尚書王瓊與彭澤有隙卽誣奏澤九疇激變番夷瓊爲覈奏擅命遣使納幣土魯番復許增幣失信致起邊釁閣部大臣及言官多救之者命下多官會議尚書石玠毛澄等議以爲大夫出使於外苟有利於國家專之可也奏上朱寧嘗有憾於澤內批褫職爲民都御史李昆叅政陳九疇亦爲民

十二年七月巡撫南贛王守仁請提督軍務許之是時江西上流山谿中劇盜四出劫掠焚官府篡獄囚廣東湖廣江西諸撫臣相觀望久之積至數十萬宸濠輒與賊通曲護賊守仁微知濠有逆意乃上疏言臣據江西上

流江西連歲盜起乞假臣提督軍務之權以便宜行事亦防濠也兵部尚書王瓊覆奏准允給與旗牌便宐行

江西一應大小緩急賊情悉聽守仁隨機撫勦以故濠反守仁倉卒得以督率諸兵討賊

十月改都御史王縝撫治鄖陽縝先巡撫南畿諸郡上疏乞省內臣以慰民望數事不報至是改撫鄖陽

巡撫雲南副都御史范鏞與王瓊左謫湖廣叅議鏞鞏昌人生平大節不與時俗浮沉爲御史以直言忤旨逮獄秉直嫉邪竟終謫籍後以中外表章復官廕子謚恭惠

十四年正月總理淮瀾鹽法副都御史王雲鳳卒雲鳳和

順人尚書佐子爲祠祭郎疏論中官李廣及異端左道
倖進者坐事謫知陝州歷提學僉事副使祭酒晉僉都
御史巡撫宣府益奮發才氣日夜理邊邊吏憚其威逾
年憂去起副都御史未任乞休雲鳳樂於從善勇於聞
過居常言動儼然終日立朝正色不避權貴當官孤立
直行已意以故上下多齟齬家素貧遭逆瑾誣贖稱貸
鄉曲終其身不能償妻女凍餒

十五年二月巡按廣西御史曹珪劾都御史楊旦時察猛
賂本兵及當國者圖以功贖罪復原職璋圖昌趙宗奪
龍州請託於旦執不可當國廣人也子弟素與叛人通

而本兵司馬擅作威福凡巡撫歲有厚餽旦獨無三人
交怒嗾珪劾之吏部爲之駁白誣竟不行尋以母憂去
時延綏缺巡撫吏部擬推布政姚鏐 上覽奏以問兵部
侍郎王憲且曰姚鏐南人恐不耐西北風王憲曰鏐有
文武材畧用之足辦 上然其言時南幸未報 上嘗
竒鏐狀貌一日鏐舟誤觸黑龍舟 上所御也 上命
執驚駕者問舟爲誰鏐驛宿不知也舟人以姚布政對
上笑曰是美髯者耶卽命釋之翌日諸中官以告始驚
謝是年冬未得命仍朝京師久之復還山東迎駕北上
十月 上還京巡撫之命始行

十六年六月召巡撫江西都御史王守仁、上降璽書慰勞行取馳驛赴闕宴賞於是月十六日奉勅旨云爾能勦平逆亂安靖地方朝廷新政之初特茲召用爾可馳驛來京切或稽遲於二十日馳驛起程爲輔臣所忌潛諷科道建言以朝廷新政武宗國喪資費浩繁不宐行宴賞之事行至中途而返道經錢塘上疏懇乞便道歸省上允之

給事中田斌言舊制提督漕運都御史兼巡撫鳳陽邇因地方多盜暫議分官專理今盜賊旣平宜兼職如故時鳳陽巡撫臧鳳業已陞任而總督漕運許庭光又頗不

厭時望於是部議庭光回籍聽用別舉以代之云

七月兵部上言邇者權奸蠱惑先帝妄自貶損號總督軍務威武大將軍凡詔旨皆稱軍門軍令臣下奉行間有形於文移章奏者請令內外諸司悉除之其巡撫等官避總督軍務之號改稱提督者宐復舊名報可

十一月逮巡撫四川右都御史馬昊下獄詳兵變

十二月甘州戍卒殺巡撫都御史許銘詳兵變
嘉靖元年正月起陳九疇爲僉都御史巡撫甘肅初九疇爲王瓊所構論宐繫獄久之得釋及瓊謫戍彭澤起入兵部久欲理九疇之寃未之及至是甘肅事聞廷舉代

許銘者衆以九疇名上從之

三年七月大同叛卒殺巡撫都御史張文錦

詳兵變

十二月 上命陝西三邊設總督軍務大臣一員該部擬

推才優望重者往吏部言致仕大學士楊一清兵部尚

書彭澤南京兵部尚書王守仁俱堪任 上命一清以

原官改兵部尚書兼左都御史提督陝西三邊軍務

命各巡撫都御史無論邊方內地有遷職或以憂當去者
必候代者到始得離任其新代者亦宜亟往不得延緩
以致債事違者聽言官劾奏

四年十二月楊一清召還廷臣首推原任兵部尚書彭澤

王守仁可代 上不允乃更推原任戶部尚書鄧璋兵

部尚書王憲會給事中鄭一鵬劾憲夤緣權倖任甘肅

壞事不可用請更擇有才望者乃又推兵部侍郎王時

中南大理卿王翊合數人疏名以上 上竟用憲趣令

赴代時科道諸臣楊言等咸請畱一清於邊御史馬錄

請合憲而用彭澤皆不聽

總理河道都御史章拯以南京給事中林士元等劾其治

軍妄殺平民處家容縱悍妻因自陳乞歸且言臣入仕

二十年惟思直道而行不務每人而悅致招怨謗罪實

在臣若謂臣治軍以酷則臣未嘗妄殺人若謂臣御家

或疎則臣實無愧妻子有旨令用心總理如故不允辭
六年五月總制兩廣都御史姚鏌罷召起新建伯王守仁
以兵部尚書總制兩廣及江西湖廣軍務守仁疏辭乞
留鏌任并薦胡世寧李承勛得旨兩廣多事方藉卿
撫定紓朕南顧之懷鏌已致政卿宜亟往節制諸調度
軍馬勦賊安民其毋再諉以負朕望仍遣官馳傳趣之
十二月吏部尚書桂萼言足食足兵安民大計全賴各巡
撫兵備官整理近年撫按兵備類不得人且遞遷太速
故事多廢弛民不蒙利邇兵部侍郎胡世寧刑部尚書
李承勛建議言各巡撫兵備宜嚴加選擇務在得人又

令久任以圖成功如周忱在蘇松二十二年王翱在遼
東十一年于謙在河南山西十八年陳鎰在陝西亦十
餘年功績著者以次加秩勿易其地所言甚於治理有
裨惟陛下採而行之上曰世寧承勛所議良是巡撫
及兵備官安民弭盜尤爲緊要不久任何以責成近來
遞遷太速多不得人巡撫官已有旨令久任何不遵行
人才難得知人亦難吏部便會戶兵二部并承勛世寧
等將巡撫兵備官從公選擇量地險要因才授任果積
有年勞如議加陞毋得仍前數爲變易負朕責成至意
七年二月上既命吏部會戶兵二部與胡世寧李承勛

考覈各撫臣宜去留者以聞於是桂萼等言湖廣巡撫孫修寧夏巡撫孟津才宜簡僻河南巡撫蔣瑤清操可稱風采不足總理南京糧儲杭淮保定巡撫林庭楫文名頗著政譽未孚遠東巡撫張云貴州巡撫袁宗儒鄖陽巡撫夏從壽提督操江張九叙或才不逾人或病多廢事議以修津調任瑤等回籍聽別用上皆從之仍諭諸臣秉公推補務求可久任者毋襲往時遞遷之弊召起王瓊爲兵部尚書兼右都御史提督陝西軍務初瓊謫戍榆林楊廷和主之璉萼等欲傾彭澤以及廷和乃上言哈密不靖禍起於彭澤陳九疇澤之復起廷和黨之也乞亟用瓊以寧西鄙上從之故有是命

王瓊既被用卽上書論九疇誣罔謂滿速兒實不歿上命逮九疇於鎮撫司聶能遷至獄事阿璉萼意榜掠備至論九疇誣罔坐斬詞連彭澤廷和請併逮治刑部尚書胡世寧力言九疇忠勇有功河西不可殺遂以快奸回輕中國得不歿戍邊彭澤金獻民俱奪官廷和獲免十一月以巡撫鄖陽副都御史林富爲兵部右侍郎代王守仁巡撫兩廣時守仁以病篤乞骸骨因舉富自代不候命卽歸上怒其專擅且疑有詐諭吏部曰守仁受國重託故設漫辭求去不候進止非大臣事君之道卿

等不言恐人皆效尤有悞國事其亟具狀以聞無何而
 守仁卒於南安恐其專斷且致其害
 八年七月給事中夏言以溫州遜卒之變請設都御史巡
 視浙江福建海道上從其言命副都御史王堯封往
 巡撫南贛都御史周南卒贈太子太保南縉雲人初大帽
 山賊流劫三省朝議用重臣督勦南往破之因移兵攻
 桃源賊黨及汀漳山巢賊悉平遂留撫其地南贛巡撫
 之設自南始

五月雲南衛卒圍巡撫都御史歐陽重詳兵變巡按御史劉
 臬劾重上命致仕復以臬糾劾過當謫補外任給事

中夏言言都御史御史皆嚙命萬里之遠托身士庶之
 上操縱舒慘而人莫之違者所以尊朝廷而重名分也
 今以軍卒一喧而撫按俱罷則紀綱法度人將謂何賈
 生尾大不掉之憂唐人藩鎮跋扈之患大抵由斯深長
 之計所當熟慮而不可忽焉者也 上切責之

十二月北虜寇大同偏頭關諸處兵部會擬以左都御史
 王憲提督宣大軍務憲抗言拒之夏言劾憲臨事畏避
 失色闕庭 上怒其竊祿苟安罷之

九年八月革甘肅督儲重臣時甘肅一鎮有巡撫都御史
 一人督理糧儲都御史一人巡撫唐澤時引疾乞休未



有俞旨而寧夏巡撫報缺無人攝理吏部欲以督儲都御史趙載總攝其事夏言上言甘肅孤懸河外不可一日缺人而災傷疊見加以兩都御史供億實難寧夏相去二千餘里兵食調發動關機宜兼攝之事從前未有唐澤病劇宜准回籍卽以趙載代澤革去督儲之任以節邊費至於寧夏缺人速宜遴補上皆從之

總制陝西都御史王瓊攻破諸番上嘉其功降勅褒獎瓊至陝二年西服土魯番率十國奉約束入貢及是諸番蕩平西陲無事河西四郡舊苦土魯番侵暴恐一旦瓊去夷患復作咸詣撫按鎮守乞爲奏留甘肅巡撫唐

澤巡按胡明善疏其事言乞留瓊以慰民心上從之十月致仕兵部尚書兼右都御史伍文定卒文定松滋人弘治二年進士授常州府推官以事忤逆瑾已陞成都府同知道逮詔獄爲民瑾誅補嘉興平姚源賊有功都御史陶琰以異材薦于朝陞河南知府時吉安多盜乃調吉安至卽擒永豐巨寇賴招壽等四百餘人于桶岡輦賊斬二千餘人得渠魁謝志山等宸濠反文定同王守仁倡義討賊身親矢石炮火燎其鬚不爲動濠擒陞按察使尋陞副都御史提督操江久之以疾致仕尋起爲兵部侍郎晉尚書提督雲南川湖軍務時芒部屢不

靖文定欲動兵力勦之以伸威百蠻乃四川按臣戴金力言其非上遽降旨罷兵召文定還督團營文定因乞休許之文定孤忠自信遇事敢爲而不能與時俯仰故功名甚著乃以犂犢終其身爲志士所深惜云
十一年二月兩廣總督林富再上疏求去是時廣寇未靖上疑富規避下巡按覈狀吏部言富旣候勘必俟至遣代恐悞機宜請如成文葉相例預遣官代之乃以提督南贛都御史陶諧爲兵部侍郎總督兩廣
原任南京總督糧儲右僉都御史林有孚先爲御史傅漢臣劾其私屬故吏臨清知州劉守臣強買民間女爲妾

逮下詔獄至是自獄中上書自白并論漢臣挾私彈劾之故上謂有孚不俟問理輒敢瀆辯令鎮撫司亟加拷訊毋得回護

十二年以朱裳爲副都御史總理河道丁憂復起前任尋卒裳沙河人性醇篤朴直目所見必行言雖久可復在官鑰戶遠嫌堂室如寺妻子甘菲惡士頌其廉謹端肅
十三年巡撫雲南副都御史顧應祥聞母喪輒回籍及聞例當候代復馳還任因上章自劾會巡按御史楊東論其往來輕率宜加罪上謂巡撫以地方爲重邇來多違制輒歸應祥革職閒任仍著爲令應祥亦上章劾東

詭譎乖張無憲臣體日與參政楊濂祝壽副使王鎔僉
事孫璽林士鳳等置酒高會而按察使蔣彬趨承黨惡
卑諂尤甚參議華金副使初杲鄒輓僉事王閣杜朝坤
等俱遠事參謁騷擾道路並宐罪得旨東彬革職閒住
濂壽鎔璽士鳳各降一級金杲輓閣朝坤下御史逮問
以戴書爲副都御史巡撫貴州時叛苗阿向與土官王仲
武數構殺書方具疏征討移駐龍里畫戎事遽卒書湖
廣崇陽人歷事三朝清如寒士輿論高之

以陳克宅爲副都御史巡撫貴州尋以討平都勻部苗阿
向功晉三品俸已調巡撫應天方代去向復構亂 詔

克宅字官顯 詳苗 歸家四年卒已事 詔復官賜祭

葬蔭子克宅餘姚人爲御史伉直敢言在鎮屢獲軍功
居家有風節教子孫凜凜有家範子有年官吏部尚書
巡撫湖廣都御史林大輅以地方水災自劾乞罷 上以
大輅受命巡撫見災求退避事沽名勒令冠帶閒住

十四年四月遼陽戍卒亂 詳兵 兵部尚書張瓚論巡撫都
御史呂經激變謫戍邊御史曾汧論救不報

八月召起姚鏞爲兵部尚書總制三邊尋罷
十五年以兵部侍郎潘旦總督兩廣旦婺源人愷悌寬厚
喜怒不形居官持大體而操履方正卒贈工部尚書



十七年五月總制三邊兵部尚書姚鏌卒鏌慈谿人端嚴博
大所至以公廉見稱子涑狀元及第

二十年正月給事中聶靜論劾巡撫大同兵部侍郎史道
培尅自豐備禦無策復妄意遷陟異脫禍機乞賜罷黜
道乃歷叙年勞并乞以奏內事情復勘上念其年勞
優詔留之

八月給事中馮亮御史王繼宗張光祖言三衛不庭北虜
猖獗京師百里之外卽爲賊巢宜遣大臣總督薊州軍
務兼理糧儲上納其言兵部議遣大臣以張漢陳經
名上請上不許特命副都御史胡守中爲兵部侍郎

兼原官給符勅以往

時北虜孔棘兵部尚書張瓚恐統兵出禦乃於乞會推總
督文臣疏中歷舉往年禦虜皆遣都御史故事奏下吏
部文選郎中曰往時邊事急推總督文臣皆兵部會府
部都衙門議上今乃移吏部又必欲推都御史渠負國
恩邊事大壞今猶爲此奸巧渠獨不知虜棘本兵自出
乎天順五年孛來寇陝西馬昂統兵麓川之役王驥嘉
靖初河西之役金獻民皆本兵也景泰時于謙自請行
邊嶺南蠻反用兵久無成功議設兩廣總督謙亦自請
行此獨非故事耶已而廷推首上瓚次毛伯溫劉天和

三人皆兵部尚書又次起用翟鵬內批用鵬總督京城南面山東河南軍務

九月兵部會題先年賊犯山西或至陽曲灣或至黃土寨或至寧武關或至四鎮衛猶皆在省城之北故迤東壽陽平定迤西交城汾州迤南和順遼州等處特有省城晏然無事今則東幾至井陘西幾至冷泉南幾至潞安犬羊之跡殆遍山西雖山東河南畿內等處俱當震搖度勢審時誠可疚心合無吏部推知兵文職大臣一員前去山西專一提督鴈門寧武偏頭等三關贊理軍務兼理糧餉制可

十二月逮繫薊州總督侍郎胡守中于詔獄初守中爲御史夤緣宰執與薛儵等俱改宮僚已而被劾儵等仍守原官獨守中進僉都御史兼詹事府丞見郭勛被寵結勛爲援有勛親信奴孫淮者守中與連袂日夜飲徵延娼家姬侑之旣而勛事敗守中恐人尾已乃先尾勛事抗疏列勛適上命守中督薊遼至鎮多乾沒內帑金又出塞伐古松數萬株以去蔽翳俾虜不得潛伏復遍索富人宿將金錢邊士怨之巡按御史洪垣上疏劾之宰執匿不以聞旣而諸臺諫各會疏繼上給事中章允賢亦言日者會官慮囚鞫勛諸疏所列狀勛俛無一語

至守中疏憤目曰守中恩以仇報衆官聞之不勝駭愕
蓋勛方盛時守中委心結納親爲慈父及其敗露觀望
揣摩又疏論之冀以自免守中昔爲御史發楊氏夜饋
之金舉承天路遺之賄皆得倖以無事今日附勛而
復攻之亦踵其故智而已今武弁一與勛連者皆不輕
原而文班如守中使得以詭計倖免臣恐國法輿情有
遺恨矣且如守中守薊贖貨多端又令其子導從往來
交通關節浮誇欺罔取玩四夷區區來遠樓之建何足
爲塞外之大觀而日勤夫匠絡繹騷然又遣昌黎李知
縣遠投賄金賂結貴近窺伺向背倏忽去來蓋小人之

無忌憚者也向使神不降罰勛得遂其所爲守中輕則
爲奸黨重則爲逆黨矣尚可寬恕乎哉上怒命收執
守中及其子併昌黎知縣俱送法司鞫問已刑部尚書
吳山等會鞫守中結納權貴以獵顯榮怠選軍政擅開
武科侵盜帑金橫索部將又造連屏而瀆獻動金鼓以
入都擅伐邊木自撤藩籬啟夷虜奔突之患毀邊疆制
禦之防法當斬首密雲副使段續張冕李文芝薊州叅
政李允升叅將周楫等畏威阿勢甘心聽從俱宜置罪
從之守中竟歿西市

以太僕寺少卿劉渠爲副都御史巡撫雲南時吏部會推

擬渠量陞憲職而御批加前官渠以非次辭詔改僉都御史給事中安宅言副都御史職崇任重雲南控制華夷渠未歷民事居太僕又係添註才望未稱請下吏部及將額外曠員不得陞用以抑冒濫詔添註官未經實歷吏部毋得擬陞劉渠令遵成命供職

二十一年正月給事中徐爌奏邊務舉廢皆由撫臣今山西巡撫陳講寇至閉關一籌莫展大同巡撫史道擅放奸細蔑視明旨龍大有濡滯就任罔遵嚴命薊州巡撫徐嵩遼東巡撫孫禴才行無聞躡陞闔職宜以都御史曾銑任大同張景華任薊州韓邦奇任山西叅政于敖

任大同而罷黜道講大有以爲失事欺罔者戒量移嵩禮內地以便其才力部議謂人才難得亦甚難知必試久乃見激勸始成今龍大有徐嵩到任未久孫禴尚未到任宜令勉修職業以付簡命俟不勝任方如爌所論量與改調其曾銑見撫山東張景華見任副都御史難遽更改韓邦奇屢經言官論薦未奉命旨宜如爌所舉特賜取用于敖候有相應員缺另行推舉詔如議

巡撫順天都御史徐嵩因胡守中被罪上疏自劾不能舉正且云守中動稱便宜行事已不得聞若抗違節制恐被誣陷上怒其支詞推諉扶同欺蔽詔黜爲民

二月詔罷總督大同尚書樊繼祖奪山西巡撫陳講前大同巡撫史道官爲民言官交章劾繼祖縱虜深入殺將喪師宐加罪謫故有是命

三月邊臣奏報虜衆復至復以翟鵬爲兵部侍郎總督宣大偏保山東河南軍務鵬將行候辭輔臣夏言未面即去言啣之鵬至鎮奏乞邊餉言謂樊繼祖買積芻粟尚未動支如何存在空虛 上命覈之至是鵬又言據降虜言賊已會衆三十萬將入犯乞亟調陝西薊遼各兵赴鎮并令多發鹽銀以備軍需 上曰鵬受新命首索帑銀舉措已乖况出京日久尚駐宣府抗命怠事深負委托姑革職閒任因併革總制官專責大同龍大有宣府楚書山西劉臬保定劉隅四巡撫防虜

七月復召翟鵬爲兵部侍郎提督宣大偏保山東河南軍務時部議言虜在山西勢甚猖獗各鎮守巡官軍因無總制未免各分彼此乞會同推舉忠誠將畧者 上命鵬往任給事中劉繪言頃者北虜南侵 陛下勅鵬往督軍務臣謂虜遁總督輒罷虜至總督增設事出倉猝機不素定非所以專責成而圖成功臣今請專任翟鵬凡兵馬錢糧悉得便宐從事 上是之因詔鵬先發後聞紀功科道官其做古監軍之制擇廉能任事者往

兵部條上備虜要務一謂各邊省撫臣才力地方或不相
宜者宜量移而不稱者宜別簡勿限資格非大故不去
任非十年不遷官政績卓茂者晉陟六卿以示優異得
旨撫臣任事一方關係甚重卽令吏部會都察院將見
任各撫臣酌量才相應存留更調

給事中馮良知等劾大同巡撫龍大有以獲一奸細及叅
政胡松以獻一短疏卽冒重賞遷秩曾無防邊禦虜之
能給事中劉繪劾山西巡撫劉臬緣結大學士夏言吏
部尚書許讚納賄黨奸一籌莫展冒破銀修築邊牆且
掩敗稱功專務欺罔宣府巡撫楚書沉酣高臥將士雖

心久握重鎮邊備日弛俱宜罷黜因薦知府聶豹叅政
王儀于敖其才猷可當一面乞亟賜推用俱下所司看
議尚書許讚等奉旨議處巡撫量才改調因言大有臬
失事應革職聽勘楚書雖乏振揚亦無過失應回籍聽
調延綏巡撫萬潮風土不宜邊事不諳應改調他如提
督巡撫等官蔡經等十八人俱堪留用詔如擬

御史金燦等亦言龍大有劉臬僨軍誤國楚書及保定劉
隅陝西趙廷瑞湖廣陸杰南京糧餉李中鄖陽詹瀚延
綏萬潮河南魏有本俱不職均宜罷斥詔吏部都察院
看詳部院覆言大有臬書潮先已奉旨處分廷瑞才識

國朝典彙卷五十五
給事中李綸又言劉隅貪殘尤著其罪浮于瀚中瀚中
可用未屢經勤勞有年連年備虜俱宜留任惟隅瀚中
才力各不及乞勅隅調用瀚中回籍候調詔如所擬已
回籍候調而隅得遇缺調用非所以服人心事下吏部
覆言隅在保定任事太劇騰謗比之瀚中推諉廢事者
不同今據綸所劾賊私狼籍則其罪且不止于罷斥
者宜令直隸撫按官覈實以聞從之於是起原任巡撫
趙錦李珏陞山西叅政王儀爲僉都御史陝西布政任
惟賢爲副都御史各巡撫錦大同珏山西儀宣府惟賢
延綏無何惟賢又爲給事中馮良知所劾吏部覆令回
籍聽勘而推河南布政張德陞副都御史代之自是更
調紛紛而邊臣益務爲欺蔽以避罪矣

二十二年四月兵部尚書毛伯溫疏言屬者並置總督大
臣是宜允濟而臣猶有過慮者四自古闔外之臣彼此
調和則士豫附但事權相埒嫌隙易生一可慮自古命
將出師最忌中制若往復奏請必至坐失機宜二可慮
近年邊務廢弛已極非旦夕可以責成言者隨議其後
三可慮總督大臣得專生殺諸將不遵約束卽加以罪
四可慮臣請文武同心決策共濟時艱軍中一切機宜
不從中制雖有小失朝議宜諒其心邊臣亦當盡心展

布卽有人言宜自省待命不當槩求引避所轄自總兵
以下有所抗撓卽許論斷如法 上俱嘉納

總督三邊兵部尚書楊守禮乞致仕吏部言守禮勳勞素

著年力尚強且當邊事孔棘之時宜留使盡心供職

上以疆圉數警守禮不念人臣死事之義乃負恩求避
命降二級該部不行參究切責而宥之

二十三年二月以兵部尚書潘鑑總督兩廣九月卒贈太
子少保謚襄毅鑑婺源人儀觀修挺性夷易不爲危言
激論而耿介壁立不可干以私治官如家恭謹潔白之
操始終一致焉

四月 上諭輔臣嚴嵩等曰邊方之事用人爲重聞山西

宣大總督蘇祐年向衰矣卿等盍擇所以代之嵩等傳
示兵部遂罷祐回籍以兵部侍郎賈應春代之

十月虜破宣府塞入紫荆關 上以巡撫朱方請撤秋防

兵太早致虜深入總督翟鵬不能禦卻職方郎中韓勗
不爲籌應俱逮下詔獄鵬削籍方勗各朴于闕下亾何
俱死尚書毛伯溫爲民乃以翁萬達總督宣大軍務

二十四年七月逮繫總督尚書張珩巡撫都御史張子立
于詔獄謫戍邊以榆林虜禍故也 珩石州人已復起
爲兵部侍郎素履修潔器識弘遠尤博綜羣籍贈工部

尚書謚襄敏

二十五年四月起用兵部尚書張經總督三邊軍務給事中劉起宗奏經前在兩廣科剋軍糧不下數萬民夷胥讒痛入骨髓交結之使往來京邸絡繹不絕惟知于進罔恤官箴乞罷經新命別選忠良有才望者任之上以經簡自廷推朕親擢用者新命甫下何遽有此疏命廷臣覈實以聞吏部尚書唐龍執奏經可任得旨張經既論劾不必用令更推堪用者乃以兵部侍郎曾銑以

原職代

八月調巡撫甘肅僉都御史傅鳳翔於江西給事中楊宗

器劾奏鳳翔狡譎競進夤緣避趨始以經武籌邊圖著論于進卽由叅政躡取巡撫一籌未展遽自甘肅改撫江西使鳳翔不宐邊材何以叅政而驟列僉都使果有經畧又何數月而輒移內地計鳳翔之姦不過欲假邊方爲進取捷徑耳况久犯清議日事營求速宐罷黜以戒奔競事下吏部竟議畱用

以朱統爲浙江巡撫兼興福漳泉治兵捕賊統言去外盜易去內盜難而去衣冠之盜爲尤難奏長嶼諸澳大俠林恭等勾引夷舟作亂貴官通番一二渠魁牟利鄉黨宐正典刑課兵嚴糾數尋舶盜淵藪破誅之又嚴根株

通海者豪右重足於是聲勢相倚者大譁切齒詆誣惑亂視聽矣

一十六年給事中張鍊論巡撫山東都御史今推提督兩廣何鰲當巡撫時值單縣妖賊竊發不能防遏於初以致蔓延成亂雖漸底削平而勞師匱餉焚劫殺戮已無算矣比奏捷詔巡按御史查勘而不及鰲乃敢違旨會勘未有債事于山東而能成功於兩廣者也仍乞以鰲下吏部詰問申飭巡按官查覈功罪以聞 上命錦衣衛械鰲至京詰問又以吏部堂上官聞淵等推舉不公各奪俸三月司官二月與推者一月降鰲福建叅議

三月南京科道張思誠陳私等劾奏巡撫四川都御史張時徹丁憂副都御史端廷赦各貪肆有跡昌濫京堂宐罷章下吏部以二臣事涉贓私宐令各回籍聽勘從之初以南京都察院副都御史或僉都御史提督南京糧儲至是提督僉都楊宐以京儲事物議沸騰給事中張汝棟論劾宐因請裁去提督下廷臣集議從之遂革都御史并於南京戶部侍郎總督事著爲令

逮巡撫貴州都御史王學孟下詔獄

詳苗蠻

逮巡撫山西都御史孫繼魯下詔獄

詳邊臣功罪

二十七年二月逮繫總制三邊侍郎曾銑棄市

詳河套

六月命右都御史張岳總督湖川貴軍務先是萬鏜班師後苗復倡亂貴州巡撫李義壯請添總督節制三省令其得以軍法從師乃命岳勦撫仍開府駐師辰州七月初浙江既設巡撫兼管福建河道以朱統爲之御史周亮給事中葉鏜俱言不便亮謂統原係浙江巡撫所兼轄者止於福建海防今每事遙制諸司往來奔命大爲民擾鏜謂統以一人兼轄二省非獨閩中供應不便卽如近日倭夷入貢艤舟浙江海口而統方在福建督捕惠安等縣流賊彼此交急簡書獨至統一身奔命已不能及今閩既設有海道自不必用都御史若不得已

不如兩省各設一員吏部覆言浙江舊無巡撫或遇有警遣重臣巡視事寧卽令止宐裁革巡撫而復巡視舊制上曰浙江巡撫去歲無故添設一時諸臣仍違議覆以致政體紛更今依擬朱統仍改巡視事寧回京凡一切政務巡按御史如舊規行

二十八年七月都御史朱統以詔安擒獲海賊奏捷因言閩賊蟠結已深成擒之後奸宄切齒變且不測臣訊得所俘僞千總李光顯等九十六人交通內應卽以便宐檄都指揮盧鏜海道副使柯喬斬之部臣請下巡按勘劾旣而御史陳九德劾統不俟奏覆擅專刑戮請治其

罪竝坐鏜及喬等詔兵部會三法司維議言統原奉勅許以便宐行事顧賊擒於一月奏發於三月似非臨陣者比宐俟得旨行刑鏜喬皆不得無過然事難遙度請遣風力憲臣往驗其事乃遣給事中杜汝禎往勘命罷統官待勘喬鏜等下所遣官訊之部以統罷去其巡視員缺更請上裁詔巡按御史熟計巡視廢置以聞既而汝禎與按臣陳宗夔劾統復急周章聽信姦回顧擅刑殺喬鏜黨比當論歿兵部尚書丁汝夔覆如議喬鏜長繫待刑統聞命憤鬱適有官校至吳江逮故天津副使朱鴻漸偵者妄言逮統統聞飲醪卒統得罪後總督亦

罷中外搖手不敢言海禁事矣統長洲人爲人清廉勇于任事讒人深入其罪竟坐憂恐歿公論惜之沒之日家無餘貲喬鏜後以王忬論解得釋

十一月巡撫河南都御史胡纘宗初以事按湯武知縣王聯削籍聯歸家殺人事覺坐絞待報聯子朝肅走京師以長至日假衣朝衣隨百官入奉天門稱父寃及奏纘宗賦詩訕上有穆天八駿英皇淚竹句乃以私郤故入人罪其巡按藩臬諸官阿附纘宗扶同羅織上信之命逮繫纘宗巡按藩臬諸官二十餘人詣京考訊旣而刑部尚書劉訥與都御史屠僑大理寺少卿沈良才會

奏王聯以重囚誣訐纘宗詩寓頌美無訕謗意其餘情
犯尤在可原下內閣擬旨嚴嵩謂訛河南人黨纘宗
上怒曰既云頌美何以有湘竹英皇句其為比護明甚
纘宗廷杖四十與訛俱削籍為民僑良才奪俸半年承
問司及吏俱下鎮撫司刑鞫嚴嵩對制平獄公忠可嘉
命兼支大學士祿俸

二十九年薊州督糧都御史李遂應召至涿州請符驗關
防上怒曰遂未經謝恩輒用新銜又九月中聞命至
今始至其下吏部該科查究以聞於是尚書夏邦謨都
給事中張秉壺等覆言南都去京陸路僅三千里遂候

代兩月即未規避亦宜量罰上謂國事方急遂聞召

遷延非人臣禮令革職為民以科部臣回護奪邦謨等

俸三月該司官及秉壺各半年

五月以魏有本為右都御史總督漕運尋致仕有本餘姚
人恂懦無華平居寡言笑至談當世務切中肯綮遇大
事毅然肩之卒贈工部尚書

六月總督宣大侍郎郭宗臯與巡撫大同都御史陳耀言
大同之役張達林椿雖没于陣而虜亦潛遁官軍被傷
者少上命奪俸既而給事中唐禹追論達効死先登
全軍陷沒屬其二子張世祿世俊以血戰潰圍得全此



數十年未有之大衄而宗臯等不自席蓐軍幕暴陳喪敗乃蔓語彌縫苟逃罪譴則死何以見張達林椿生何以謝二子宐明示賞罰以昭勸戒上悅禹奏公正詔達二子同廕與椿子鳳騰俱指揮僉事世襲命錦衣械繫宗臯耀至京廷杖之耀死杖下宗臯謫戍遼東邊諸部將戴綸徐仁歐陽安等俱論死長繫刑部獄

九月初設薊遼總督以薊州保定遼東三鎮隸焉改工部侍郎孫禴爲兵部任之禴因言朶顏三衛部落日蕃屢次侵噬花當脇求添貢把兒孫深入擄掠動挾北虜以恐喝中國自胡守中撫賞過盛益驕戎心今北虜出占北

口道由朶顏而佯爲不知縱使深入負朝廷厚恩宐及其貢使宣示恩威俾知悔罪從之

十一月置三輔經畧都御史以易州昌平州及通州爲三輔各設經畧以翁萬達至愆期謫駐易州召許宗魯駐昌平州及通州王忬爲三輔經畧使

三十一年七月以都御史王忬巡視浙江海道及興漳泉地方時倭寇猖獗日甚廷議復設巡視重臣忬時巡撫山東聞命卽日至浙度所治軍府皆草創而浙人柔脆不在戰所受簡書輕不足督率吏士乃上疏請假事權誅賞得便宐且欲嚴應援之律寬損傷之條且勦且撫

勿拘從之忬任叅將俞大猷湯克寬爲心膂徵狼土諸兵及募溫台諸下邑築黠少年分隸諸將布列瀕海各鎮堡嚴督防禦浙人恃以無恐

三十二年二月王忬以巡視權輕不足督率吏士請改勅文及印記從之乃改巡視爲巡撫

閏三月總督三邊兵部尚書王以旂卒以旂江寧人爲總督在鎮六年開誠布信虜無深入前後禦虜斬首以千計其所繕障塞皆堅壯可恃西人賴之至是疾作許致仕卒于固原鎮邊民號泣罷市詔贈太保謚襄敏

四月先是科道建議增置營田鹽法屯牧三都御史乃以

王達整理屯牧王璣招撫營田王申清理鹽法至是御史霍冀言屯牧宜責之山西等處巡撫營田宜責之鳳陽山東巡撫鹽法宜責之巡鹽各御史庶幾省費寬民云下吏部覆議從之王達等各還里聽用上曰天下大政屬之六部言官意見或有異同部臣當執可否以爲行止如何輒便題覆以致方行遽改甚非國體顯事依違前無定執姑宥不究王達等俱准裁革仍行巡按御史勘覈各官有無成效具奏

七月詔以兵部左侍郎賈應春總督陝西三邊軍務應春因言總兵以鎮守爲職而巡撫則贊理軍務至統攝調

遣又總督任之防守疎虞軍餉不繼奸弊不釐責在巡撫若訓練不精兵革不利士馬不强至于畏縮殘害罪在將官其有摧鋒破敵奮勇血戰之功撫臣不得同其賞如撫臣身督戰陣躬冒矢石及設策出奇指授方畧者則議賞以爲任事者之勸 上從之

三十三年二月巡按直隸御史孫慎劾應天巡撫新陞南京工部尚書彭黯身居重任不能出死力以扞地方賊盤據南沙杜門高臥臣屢趣之進兵黯不得已一至太倉散千金以募勇士日給廩餼所糜又以千計曾一矢未發俄已退還南京矣未幾而工部尚書命下黯遂封

其印綬寄之應天府一切軍務俱置不理不念職守不候交代樂于脫一己之患害而忍於視百姓之魚肉乞重治以懲大臣偷安避事者 上怒命錦衣衛械繫至京鞫問黜爲民

史部請以江西右布政方任代彭黯未任以憂去復以左布政使陳洙代之曾黯被劾得罪 上命再推忠謹堪任者以聞大學士嚴嵩言洙已陞任 上曰卿謂代黯有人不知其人才猷能勝黯否且今地方危急一日不容縱賊又恐其人遠不能卒至奈何卿可同吏部尚書默詳議之默因言蘇松巡撫所轄十二府州地方不便

兼轄况當軍興之際調兵轉餉難責一人請添設提督軍務大臣一員責之勦賊而令巡撫洙專督糧餉上曰總督與撫臣竝設未知當否其再會同兵部詳議以聞於是默等復與兵部計皆言兵糧兩分行事未便不若依近年浙江例令提督巡撫合爲一人庶責任專而績効可勉洙暫令回籍候補上以爲然因改南兵部侍郎屠大山於應天巡撫兼提督自大山始大山鄞人已以倭寇失事逮繫詔獄事白釋歸家居二十年卒清約如寒士終其世未嘗以一言干有司晚年尤習黃老朗然寧照而已

五月給事中王國禎賀涇御史溫景葵等以倭寇倡獮逼近畱都各上疏乞調兵給餉及推選總督大臣重其事權如往年征勦華林麻陽諸寇故事下兵部集廷臣議俱稱便因薦南京兵部尚書張經堪任總督乃命經不妨原務總督南直隸浙江山東兩廣福建等處軍務一應兵食俱聽便宐處分臨陣之際不用命者武官都指揮以下文官五品以下許以軍法行事

詔復以侍郎賈應春提督陝西三邊軍務命侍郎許論總督宣大山西軍務初應春自三邊召佐本兵尋又移鎮宣大以代者江東未至久畱不發御史胡宗憲等言東

患病蒞任無期而三邊去宣大久遠今時已入夏防秋
伊通宜留應春仍總督三邊別于近地推補宣大庶彼
此調度有人而邊方有賴故有是命

七月時虜日屯聚大同等衛聲言大舉總督許論上疏告
急兵部言宣大芻糧數月不給士馬物故者枕籍於道
乃先任督撫漫不省憂致貽今日之患罪不容辭 上
怒遂命錦衣獄械逮總督尚書蘓佑巡撫都御史侯鉞
至京命戶部發太倉銀十五萬兩委大臣實心能任事
者賑之吏部推刑部侍郎陳儒忠實可用遂命兼僉都
御史往大同賑恤軍士已而祐等逮至各上疏自辯法

司職問其前後章疏皆虛塞責無幹濟實心俱黜為民

上以大學士嚴嵩可撫大同者嵩倉卒不知所對 上曰

知王忬可乃手勅吏部曰朕思大同撫臣須得人乃

其以王忬為副都御史巡撫其地趣令之任初忬在

薦盧鏜釋柯喬激厲諸將鄧城劉堂孫敖夏光等爭

遂北或以死綏著節復廣為偵制凡沿海大猾稱倭

去王者悉繫按覆其家破解黨與自是倭奴不復知我

虛實與所從嚮往而餘艤在海中者亦無以菽粟通火

藥矣往往食盡自遁散又行視諸郡邑未城者計寇所

由緩息次第城之凡三十餘所杭州官吏以烽火不時

發日集坊民登陴守夙夜怨苦忬令罷之曰吾斥堠明無慮弗及奈何先敵而逆受困敝耶一郡大喜至是往撫大同以徐州兵備副使李天寵爲僉都御史代忬忬去而浙中之禍始慘矣

十月給事中李用敬論劾總督南京兵部尚書張經縱賊誤國四事 上是其議命改經爲右都御史兼兵部侍郎專一總督軍務尅期平賊不許怠悞

三十四年三月詔進王忬兵部左侍郎總督薊遼忬撫大同方半歲而薊遼總督楊博入爲本兵廷舉忬 上手署用忬代博令速赴鎮不必候代

以提督南京操江都御史史褒善爲南京大理寺卿給事中楊巍言東南倭夷方熾叅贊巡撫俱以失事黜褒善幸脫罪譴乃得美遷以釋重負因循規避若此寇患何時已乎乞還褒善原職仍併將銓部罰治 上是巍言令褒善仍督操江奪選郎俸一月尚書李默等姑貸之初總督尚書張經至浙中有府同知張任者先爲郎嗤經經啣之經行部至其府夜令人踰城出質明詰責任司兵防不嚴城守褫衣冠縛而箠之藩臬府官俱不敢一營解得監織內臣馳入止之任囚首僂跣出不勝辱欲自縊知府夜伴之乃免 國朝府貳無受笞者遠近駭

異人心稍不予經其所用諸將佐何卿沈希儀輩名位已抗驕不爲用而新拔士又慄猾不任兵所徵田州兵瓦氏山東鎗手又不受律以故連戰敗衄名實頓損時侍郎趙文華挾嚴嵩劾願指凌經經自以爲大臣儼然其上不爲屈文華志連疏劾經謂其才足辦平賊第以家在閩避賊仇故趨起縱舍賊耳會臺諫亦有言者上大怒遣官抄逮捕經未至經已大集兵破倭於嘉興王江涇斬首二千餘級被溺死者稱是事聞兵科奏乞留經自效平餘倭不聽併巡撫李天寵俱逮至京下獄考訊論以縱寇罪死文華復奏以巡按御史胡宗憲爲

僉都御史代天寵巡撫而以南京戶部侍郎楊宣代經

總督經天寵俱論斬竟死西市

十二月總督三邊太子少保兵部尚書楊守禮卒守禮蒲州人爽朗有大度才具敏達所至著聲績其襟宇冲曠不屑爲世俗態晚年見時事乖異放情山水間以詩酒自娛鄉人殊敬慕之

總督漕運右都御史王誥卒誥臨城人體貌魁偉丰神俊整天性孝友僮儻有大計遇事敢爲不喜矜伐久歷邊鎮威望赫然至今人想望其風采

三十五年二月總督楊宣以近日福建被倭浙江督臣遙

制不便請專設一巡撫卽其地經畧之兵部覆設巡撫
事體未便宜暫設巡視都御史俟事畢議革 上從之
乃命光祿寺卿張煥爲僉都御史以往煥辭以權輕乞
假督撫銜得節制全省調度兵食爲便部覆請更銜爲
巡視福建地方 上竟寢前命仍以巡視福建海道屬
浙江巡撫雷煥別用

詔罷直隸浙福總督楊宜時趙文華與巡撫胡宗憲私厚
亟欲以宗憲易宜文華正月中入京 上諭大學士嚴
嵩問文華南寇始末文華卽昌言寇起時苦無兵今兵
集苦督撫非人不能調度請以宗憲代宜故特詔罷之

三十七年三月逮繫總督宜大

兵部侍郎

楊順于詔獄

詳功罪

給事中劉祐御史宋儀望劾提督福建都御史阮鶚命遣
官抄逮繫下鎮撫司拷訊罷爲民

黜巡撫遼東都御史蘓志臯爲民以去年虜入遼陽不發
兵救援而妄報首功尅減軍餉爲給事中張益所劾也
四月命兵部尚書楊博出督宣大軍務時大同右衛圍久
不解議者以爲非博往不可 上遂命博出督宣大虛
部中位以待之

五月右衛圍解議召還楊博給事中張學顏言宜改博事
權令其專意綜理不必還部 上以爲然乃命博留鎮

視事博因陳善後二十餘事于右衛東路牛心山諸處築大小土堡九座墩臺九十二座接連左衛高山站以達鎮城濟大河二道各長十八里五旬訖工請命御史視之上嘉其功大速降勅加獎賚以銀幣

九月科臣劾奏宣府巡撫張鎬庸劣寡謀薊鎮巡撫馬珮貪污有跡宜罷黜寧夏巡撫王鎬才乏振揚總督三邊王夢弼守多疵議且言近年巡撫員缺每于叅政副使內不次擢用法固善也但人臣多巧於進取而臣節難保其有終方其遷轉時勉效馳驅求釣聲譽及已在位志氣盈滿因以貪漁寵賂肥潤身家未聞有爲邊陲建

久遠之業者也自今巡撫之選尤宜循用資格卽未必得人猶可以杜倖門之進也詔張鎬馬珮俱革職閒住王夢弼致仕王鎬調南京別用仍命今後巡撫選擇資望相應者推補不得徒以虛名驟遷致誤地方

三十八年五月直隸巡按御史方輅劾奏總督薊遠保定右都御史王忬調度無策貽害地方當虜屯會州擁衆南下則潘家口最當衝要乃漫不設備致虜乘虛而入失策一虜前犯灤東意在西入忬擁衆東援北虜已西而我反東阻失策二總督重臣止應居中調度以便策應忬一聞虜東卽倉皇馳逐致喜峰以西全無寸備失

策三縱中軍張倫擅調將官更易主令一可罪與虜對壘脅於將領遂束手坐視二可罪張倫怙勢凌衆怙寵任之致令債事三可罪入衛官軍假稱虜衆乘機鹵掠怙不能制四可罪空亟黜爲民別選才望代上謂怙官久志怠調度失宐致賊深入畿輔生靈被慘命錦衣衛差官校并張倫逮赴京鞠治初楊繼盛劾嚴嵩爲所陷死怙聞悼甚而其子世貞嘗從繼盛游又爲經紀其喪嵩啣之常欲有以中怙及職方郎中唐順之出覈薊卒以粉榆故頗露嵩意于怙要之謝嵩怙唯唯不欲以汗請順之還奏薊鎮額卒減少三萬餘人且云一卒未

練仍以徵發疲各邊嵩擬旨當重致罪姑奪祿責後效上從之初怙實以鎮卒異悞不任戰雖練無益而諸隘迫虜不得不徵發以爲固然不敢辯而疏上練兵十三事曰請以三年爲期嵩嘻曰何昔畧而今詳也且渠尚欲三年耶及灤河之役嵩啖言官劾總兵等官置之死欲以搖怙而都御史駉懋卿復給怙曰政府以邊事重不欲困若行且縱若歸矣盍自投劾去怙信之果請放歸懋卿復爲草授方輅曰政府欲逐王怙而怙復請歸若盍劾怙兩遂之輅亦信懋卿乃疏怙當罷嵩得疏卽擬旨逮怙上從之乃遣官校械怙至京下錦衣獄考

訊爰書既具世蕃復削去所叙功次上之下刑部論罪尚書鄭曉惜忤持不從重擬謫戍奏上上降旨曰軍令指揮之誤諸將皆斬令從重擬坐乃比守邊將帥備不嚴失陷城塞律斬長繫待報竟歿西市

六月詔改宣大總督兵部尚書楊博總督薊遼軍務初博在宣大有函字素雄塞外屢肆侵擾博計擒之斬其黨十有五人時出奇兵襲虜虜徙帳去乃列上修邊四事費半功倍上嘉之至是王忬罪繫乃移博總督薊遼時方盛夏博聞命卽赴鎮區畫戰守事宜虜聞楊總督至悉引去博以及朶顏等屬夷每通虜不爲我用乃約束

諸帥同時舉燧遂揚旄燾自居庸至山海瀰漫千餘里旌旛連天颯石震山谷如是者三屬夷牒報虜虜大震疊以爲我兵頓增益連瑕爲堅終歲不敢近塞下

巡撫淮揚僉都御史唐順之卒于官順之武進人舉己丑會試第一授兵部主事尋調吏部改翰林以請朝東宮落職已以倭寇薦起兵部郎視師浙直胡宗憲薦其有文器材宜超格用之乃以爲通政仍同宗憲經畫軍政擢前官順之文行爲學者所宗於瑣屑之事若不甚通曉至于籌畫世故則辨悉毫芒無所不盡

三十八年以石永爲兵部左侍郎總督湖廣川貴軍務永

一崇寬大率屬以廉凡事務責實效不爲文具猥賊沈雅等勢猖獗督率將士直擣其巢於淑浦龍潭諸洞捷聞賜銀幣方隅晏然明年召入戶部瀕行卒

三十九年四月命總督宣大都御史張松回籍聽用先是上諭戶兵二部曰朕聞自博入胡奴守墻外俟犯恐總督非松才也卿等議處以聞部覆松雅稱謹飭但非經畧才誠如聖諭因薦大同巡撫李文進及保定巡撫葛縉可代松 上初欲用文進旣而謂巡撫未久乃用縉給事中曾廉劾應天巡撫翁大立不職吏部覆奏大立率易更張有失衆心命還里聽用

五月南京御史李瑚劾胡宗憲要功致寇下兵部議不問已而閩廣浙直倭寇日熾福建巡按樊獻科請趣宗憲赴閩應援浙江巡按周斯盛請勅兵部趣宗憲督師勦寇宗憲聞命泄泄已而寇稍解散竟以功進兵部尚書又特疏請沿海撫巡諸官悉聽節制其體統如三邊而勦臣總兵者亦由掖門通謁庭拜下風矣

十一月總督南京糧儲都御史章煥自淮安改任會城工未完且漕運總兵叅將俱赴京會議因畱數月督漕運過淮乃發仍假道過家於是南京給事中馮出圖等劾之上以煥專事談論意本欺誦特命逮送法司擬罪

刑部尚書潘恩奏煥繁言瀆聽當坐突儀仗安奏訴律得旨發邊衛充軍煥有文學其上經畧中原疏且言妖盜並興寢成大患頗抱憂時之志第其中處畫空疎又當一統全盛之時而爲經畧中原之語亦非所宜言故上心厭之遂得罪竟歿戍所

四十年正月逮雲南巡撫都御史游居敬充邊衛軍

詳士官

給事中曾廷芝論劾巡撫宣府都御史遲鳳翔貪污殘酷有旨逮京下獄訊治以事多誣調外任起原任操江僉都御史趙孔昭代之

原任總督漕運右都御史陳儒卒儒世出交南祖復宗以

戰功授錦衣千戶詔世補京學儒登進士始以文著蒞官盡心職務歷官山東布政以鄉試提調犯上怒逮獄謫宐君典史歷陞戶部侍郎至今官條陳漕政事宐無不切當擒斬倭寇三獻捷于京師致政歸杜門謝客絕口不道時事

四十一年四月命兵部左侍郎葛縉督視遼東軍情時虜酋土蠻等大舉寇遼東巡撫都御史吉澄請如大同往年故事特命重臣調發兵糧救援且促新任總兵吳瑛到任上諭兵部曰吉澄所奏地方危甚吳瑛果勝任否因令更推才望大臣一人督視軍情乃舉縉代之

九月給事中張鳴瑞疏論已故三邊總督魏謙吉以貪暴失士心原任福建巡撫王詢以佞諂得進用數年以來徇虜驛騷入閩殘破咎各有歸事雖既往仍當追論詔追奪謙吉贈廕祭葬詢削籍爲民不許朦朧奏起仍令兵部申飭各邊臣悉心經理兵務毋復效尤

十一月南京給事中陸鳳儀等上言胡宗憲十大罪潛結海寇汪直欺天冒功大罪一奉旨會勦江閩群盜偷安不行違旨玩寇大罪二虛張兵數侵蝕軍需大罪三延納贊畫嚴中茅坤蔣孝呂希周田汝成等競爲奢僭糜費無紀大罪四扣減織造價值侵盜謨國大罪五遍府

驛派解廩給銀兩縱吏舍騙索廩糧馬匹流毒驛傳大罪六私出把總僉總告身賣官通賄大罪七以杭州衛官廠私餽鄉官茅坤徇私滅公大罪八私役官兵以之送子守家爲門子報怨大罪九娶杭州部民洪梗女爲妻留卒役來任徐子明之妻于督府宣淫敗度大罪十乞將宗憲罷斥別選才良以紓南顧之懷章下吏部覆奏宜置于理上然之命逮宗憲赴京考訊獄具削籍爲民

十二月上諭大學士徐階浙閩總督似不必設階言地方已就平寧百姓遭宗憲擾害之後有資綏緝止宜設

巡撫重臣于勅內開載浙直有警互相應援之語似爲便益從之乃以趙炳然爲右都御史巡撫其地

四十二年九月令總督閩廣都御史張臬致仕陞總理河道副都御史吳桂芳爲兵部右侍郎提督兩廣軍務兼理巡撫時和平賊李文彪作亂臬以其地險難用兵倡議撫之給事中陳懋親劾其縱寇殃民部議亦以臬非軍旅才乃薦桂芳代之且言閩廣道里隔遠不便兼轄請罷總督止以提督兼巡撫上從之因有是命

逮繫總督薊遼侍郎楊選及整飭薊州邊備都御史徐紳于詔獄上以虜由薊鎮出入怒選等失職命逮選及

紳下鎮撫司考訊而以兵部侍郎劉燾代選以僉都御史溫景葵代紳已而獄具選論死斬于都市紳削籍爲民初言官李瑜劾選及江東等請同加罪上以爲過諮於徐階階言江東不宜與選同論故東得免

四十三年四月詔巡撫山東副都御史張鑑回籍聽用以太僕卿鮑象賢爲戶部侍郎代之鑑勇于任事在山東行均田保甲之法又募民開墾荒田民多不便者於是給事中趙灼等交章言其舉動煩苛更張無漸羣情惶駭恐生亂階乞亟罷鑑而別選老成持重者往代之故有是命

國朝典彙卷五十五
巡撫山西副都御史毛鵬卒鵬棗強人體貌魁梧丰神爽
朗賦性剛介持身端嚴博典籍工詩文孝友孚于里閭
至其經濟醞藉尤爲時所推重卒年四十四
四十四年九月總督宣大太子少保兵部尚書兼副都御
史江東卒東朝城人嘉靖乙酉進士累官戶部尚書改
南京兵部召還以本兵協理戎政已復總督宣大在鎮
四年 上嘗遣中使慰勞璽書褒獎命兼督宣大薊遼
等六鎮卒于懷來賜祭葬如例贈少保謚恭襄
十月先是浙江總督胡宗憲以侵盜軍餉爲言官所劾宗
憲以書抵所親羅龍文賄求嚴世蕃釋罪書未達仍匿

龍文所及龍文伏誅巡按御史王汝正奉詔籍其家得
宗憲所與世蕃書上之因言宗憲昔與王直交通每藉
龍文爲內援相與諂事世蕃故事久不發今蒙恩放歸
不思補過愈肆猖狂招集無賴暴橫鄉里其罪不減于
世蕃龍文乃二犯已正明辟而宗憲獨倖免何以服天
下心又聞龍文長子六一素稱大猾且習通倭初匿宗
憲家今不識受指何嚮矣使六一得亾南走倭恐江南
之事其大可慮者又將在此疏下都察院叅覆得旨錦
衣衛執宗憲來京詰問革其子錦衣千戶松奇職爲民
六一下撫按緝捕已而宗憲疏辯叙平賊功并節年獻

國朝典彙卷五十一 總督巡撫
瑞蒙恩以致言官忌嫉且訐汝正私受所屬贓上心
憐之亦下法司併訊刑部因請將汝正宗憲互訐事情
行巡撫操江都御史勘報從之宗憲尋歿于獄詔免勘
四十五年三月革撫治鄖陽僉都御史陳志間任志先爲
御史按江西代歸至崇安遇盜亾其四篋署縣推官吳
維京爲捕獲而還之志猶有恚色維京入官吏部颺言
志前所失篋爲盜發悉金寶所有賂籍二扇計不啻數
萬金志故無潔稱遂爲給事中何起鳴所追劾故罷
九月以李佑爲僉都御史巡撫廣東先是兩廣自成化間
設總督兼巡撫至是言官建議宜復設廣東巡撫故有

是命

隆慶元年以趙孔昭爲兵部右侍郎提督山西鴈門關時
順義雖稱欵塞事實叵測孔昭日修邊事增堡峻險虜
避不敢入報賜金帛
原任山西巡撫僉都御史趙時春卒時春平涼人以庶吉
士授兵部主事以建言革職起編修復以建言革職復
起兵部主事歷都御史爲人沉毅慷慨敢於任事及習
騎射有將畧時重其才
以兵部左侍郎劉燾總督兩廣軍務時海寇曾一本倡亂
廣閩廷推燾總督給事中鄭大經疏言頃 皇上以兩

廣用兵特簡劉燾爲總督顧今所患不在無燾而在任燾之未至耳臣謹條上六事曰重事權久信任寬文法聽委用廣招徠厚賞格此皆所以委任將帥而責成功也吏部覆謂兩廣經畧事宜悉如大經言而廣福接壤爲唇齒之地宜令燾兼督福建軍務庶事權歸一易於成功得旨允行

給事中張鹵疏言總督陳其學平生清謹殊乏揮霍之才巡撫王遴不近人情太鮮含弘之度宜處又言宣大總督原駐陽和居兩鎮適中之地便于經畧已而移駐懷來專備南山夫虜不能越上谷以伺南山則南山不宜

株守明矣請如故事令總督駐陽和兵部覆議得旨令陳其學回籍聽用王遴策勵供職今後總督每遇春秋兩防照舊駐劄陽和有警相機調度餘俱如議

三年十一月以江西按察使殷正茂爲僉都御史巡撫廣西先是廣西以總督兼巡撫後以廣東未寧而廣西古田之變尋起勢不能專制於是議者皆言宜設專官督理軍餉兵部以爲請詔吏部舉堪任者以正茂爲之以劉應節爲兵部右侍郎總督薊遼保定軍務應節大修京東西諸路邊自廣寧抵開原葺墻八百里建堡二十有三墩臺六百三十有奇是冬虜再犯遼東清河堡上


首功五百八十有五獲馬駝各六百餘捷聞陞俸一級
命調江西巡撫兵部右侍郎任士憑撫治鄖陽僉都御史
劉秉仁于南京別衙門用以御史凌儒等劾其不職也
已而給事中吳時來等又言秉仁前議裁革分守太和
山內臣首鼠畏禍乃疏薦太監李芳暗結其心無大臣
節不得槩從輕貶秉仁坐罷
四年正月給事中舒化言巡撫應天都御史海瑞著節先
朝誠一代直臣然迂滯不諳事體科條約束切切於片
紙尺帛間以難過客恐非人情如瑞第宜與兩京清秩
以風激天下之士蓋所以全地方亦所以全瑞也得旨

海瑞節用愛人勤事任怨留撫地方如故

二月總督南京糧儲僉都御史張鑑以病乞歸許之未行
而卒鑑爲人貌類朴野而節行高潔士論稱之

給事中戴鳳翔論海瑞每日開門受訟動盈千紙民間有
種肥田不如告瘦狀之謠至於散兵激變則糧餉不敷
而取諸民壯之工食議處驛遞則仇視過客將一應正
支盡行革免禁佃戶不得完租貧民不得償債皆迂狂
顛倒之甚吏部覆言瑞志大才疏宜改授兩京他秩命
以原官總督南京糧儲以朱大器爲副都御史代之
五月裁革廣東巡撫改兩廣總督李遷爲提督兼廣東巡

撫先是給事中光懋言兩廣總督建置已開府蒼梧坐鎮東西兩省今更設二撫臣不惟多官多費適滋紛擾而於人情馳驚事勢牽挽尤為多端宜革撫臣復提督便御史蘇士濶亦言二粵勢如輔車總督居中控制不惟聲援聯絡且事體歸一章並下吏部覆可故有是命



真和堂

